

संक्षिप्त बुद्ध वंश

(दोश्रो भाग)



पदुम तथागतयाके शाक्य मुनी बुद्ध जुयाबिज्याईम्ह सिंह
राज बोधिसत्त्वं बुद्ध ज्वीगुलागि प्रार्थना यानाच्चंगु ।

101e

अनुवादिका
अनगारिका धम्मवती


धर्मकीर्ति प्रकाशन (नेपाली भाषामा)

१. बौद्ध दर्शन
२. पञ्चशील
३. शान्ति
४. नारी हृदय
५. पटाचारा स्वविर चरित
६. बुद्ध शासनको इतिहास (भाग-१)
७. नेपाली ज्ञानमाला
८. बुद्ध र वहाँको विचार
९. बौद्ध ध्यान
१०. लक्ष्मी (प्र. सं.)
११. उखानको कथा संग्रह
१२. बौद्ध जगतमा स्वास्थ्य सेवा
१३. वेस्सन्तर जातक
१४. सतिपट्टान भावना
१५. बौद्ध विश्वास (भाग-१)
१६. बौद्ध विश्वास (भाग-२)
१७. बौद्ध दर्पण
१८. महासतिपट्टान विपस्सना अन्तर्मुखी ध्यान
१९. सप्त रत्न धन
२०. सफलताको रहस्य
२१. धर्म: एक चिन्तन
२२. मानव महामानव
२३. निरोगी
२४. जातक कथा
२५. प्रज्ञा चक्षु
२६. तथागत हृदय
२७. सतिपट्टान विपस्सना
२८. बौद्ध प्रश्नोत्तर
२९. परित्राण (प्र. सं.)
३०. बुद्ध पुजा विधि र कथा संग्रह (प्र. सं.)
३१. मैले बुझेको बुद्ध धर्म
३२. बुद्धको जीवनी र दर्शन
३३. आमा बाबु र छोराछोरी
३४. स्नेही छोरी
३५. परित्तसुत्त (पालि भाषा)
३६. मति राम्रो भए गति राम्रो हुनेछ
३७. बुद्ध र बुद्ध पछि
३८. "बुद्ध र बुद्ध धर्मको संक्षिप्त परिचय"
र "बुद्धको जन्मभूमि नेपालमा बुद्ध
प्रति असहिष्णुता"
३९. अ. धम्मवती
४०. बौद्ध ज्ञान
४१. संक्षिप्त बुद्ध जीवनी
४२. मिलिन्द प्रश्न (भाग-१)
४३. मिलिन्द प्रश्न (भाग-२)
४४. भ्रमण तारद
४५. मानव स्वभाव
४६. महास्वप्न जातक
४७. बुद्ध पुजा विधि र कथा संग्रह(दि. सं.)
४८. बौद्ध विश्वास (भाग ३)
४९. बुद्धको अन्तिम यात्रा (प्रथम भाग)
५०. लक्ष्मी (दि. सं.)
५१. सम्यक शिक्षा
५२. परित्राण (दि. सं.)
५३. धर्मकीर्ति बौद्ध अध्ययन गोष्ठीको
२५ वर्ष
५४. बुद्ध पुजा विधि, कथा संग्रह र
परित्राण
५५. बुद्ध पुजा विधि र परित्राण

Dharmakirti Publication
(English)

1. Buddhist Economics and the Modern World
2. Dharmakirti Vihar Today
3. Dharmakirti Vihar
4. "Dharmakirti in Nut shell"

संक्षिप्त बुद्ध वंश (दोश्रो भाग)



अनुवादिका
अनगारिका धम्मवती

प्रकाशकः

धर्मकीर्ति बौद्ध अध्ययन गोष्ठी

धर्मकीर्ति विहार, श्रीघः नघल

काठमाडौं

फोन: २२०४६६

बुद्धसम्बत् : २५४०

नेपाल सम्बत् : १९९८

विक्रम सम्बत् : २०५४

इस्वी सम्बत् : १९९७

प्रथम संस्करण : १८०० प्रति

कम्प्यूटर टाईप सेटीङ्ग

नबिना शाक्य

मुद्रक :

ज्योती प्रिन्टिङ्ग प्रेस

लाजिम्पाट, काठमाडौं ।

फोन : ४२८४८६, ४२८४८८



कान्छा रत्न तुलाधर

बुगु दिं : ने. सं. १०३० कार्तिक शुक्ल प्रतिपदा

(बि. सं. १९६५ मार्ग १० गते)

मदुगु दिं : ने. सं. १११७ मार्ग कृष्णा प्रतिपदा

(बि. सं. २०५३ मार्ग ११ गते)

धर्मदान

सांसारिक जीवन धयागु दुःखं जायाच्चंगु खः धकाः बुद्धया अनित्य, दुःख, अनात्म ज्ञानयात अध्ययन यानाः थ्वीकादीम्ह जिमि अबुजु दिवंगत कान्छा रत्न तुलाधरजु खः । वय्कलं थःगु जीवन पालचाया चिकं इताःथें तुं च्याकाः सम्पूर्ण थः जहान परिवारयात मतजः बियादिल । गबलें हे तःधंछु मजुसे सकसितं हित ज्वीगु ज्या यानाः भगवान बुद्धं क्याना बिज्याःगु मध्यम मार्गयात थःगु अन्तिम घडी तकनं अनुशरण यानाः वय्कः ने.सं. १११७ मार्ग कृष्ण प्रतिपदा खुन्हु (जन्म जुगु दिनस) थ्व संसार त्याग यानाः भ्नी सकलसित त्वःता भाल ।

ने.सं. १०३० कार्तिक शुक्ल प्रतिपदास छगू मध्यम बर्गिय परिवारय् जन्म जुयादीम्ह वय्कः वाल्यकालय् हे थः मांयागु ममतां बिछोड ज्वीमाल । मचानिसें तीक्ष्ण बुद्धि व मेहनती प्रकृतियाम्ह जूगुलिं थःम्हस्यां हे अध्ययन यानाः नेपाली भाषं जक मखु अंग्रजी भाषं तक नं आखः ब्वनेगु व च्वय्गु सय्कादिल । उलि जक मखु वय्कलं बाज्या बराजुया पालं निसें याना वयाच्चंगु बनिया ज्यायात छखे चीकाः वय्कलं हे दकसिवे न्हापां मोटरयागु सामान मीगु पसः तयाः छगू न्हूगु इलम नीस्वना दिल । कर्मवीरम्ह जिमि अबुजुं थुगु इलमय् यक्को मेहनत यानाः न्हिया न्हिथं प्रगति यानादिल । वय्कः कान्छा रत्नयः थुगु पसः “विश्वकर्मा नेवाः” या नामं परिचित जुयावन ।

(क)

स्वार्थ भावना छफुति हे मतसे थः परिवारया सकलें सदस्यपिन्त भिं तुनेगु हे वय्कःया मू इच्छा खः । वय्कःया भचा फुर्सद दतकि हे थः न्ह्योने सु दु वयात धर्म सम्बन्धी अर्ती व उपदेशया खँ न्ह्यथनेगु वय्कःया बानी खः । जीवनया अन्तिम घडी तक नं वय्कलं सकल परिवारपिन्त ज्ञान गुण हे जक बियाथकल । वय्कःया पुण्य स्मृतिस याणागु थुगु धर्मदानं वय्कःया इच्छा पुवनेमा धयागु मनं तुंसे थुगु सफुया माध्यमं अपोसिनं बुद्धया शिक्षा सय्का सीकाः थथःगु जीवन सुखमय याय् फय्मा धकाः मनंतुना ।

काय् प्रेम सुन्दर तुलाघर
भौ रूप शोभा तुलाघर
व सकल परिवार

Dhamma.Digital

प्रकाशकीय

थुगु “संक्षिप्त बुद्ध वंश; दोश्रो भाग” सफू धर्मकीर्ति विहारया १३३ गूगु सफू खः । बर्मी भाषं प्रकाशित जुयाच्चंगु सफू “संक्षिप्त बुद्ध वंश” स्वयाः नेवाः भाषं संक्षिप्त रुपं २८ म्ह तथागतपिनि जीवनी अनुवाद यानागुली न्हापां प्रकाशित ज्वी धुंकूगु “संक्षिप्त बुद्ध वंश प्रथम भाग” सफुती भिम्ह तथागत पिनिगु (तण्हंकर बुद्धं निसें अनोमदस्सी बुद्ध तक) संक्षिप्त जीवनी उल्लेख ज्वी धुंकूगु दु ।

थुगु “संक्षिप्त बुद्ध वंश दोश्रो भाग” सफूती मेपिं १० म्ह तथागत पिनि (पदुम बुद्धं निसें तिस्स बुद्ध तक) संक्षिप्त जीवनी उल्लेख जुयाच्चंगु दु । थुगु सफू प्रकाशनया लागि दिवंगत भाजु कान्छा रत्न तुलाधरया पुण्य स्मृतिस वय्कःया काय्भाजु प्रेम सुन्दर तुलाधरं आवश्यक आर्थिक सहयोग प्रदान यानादीगु खः । उकें दिवंगत जुयादीम्ह साहुया सुगति कामना यासे चन्दा दाता वय्कःया काय् प्रमुख सकल परिवारपिनि आयु आरोग्य ज्वीमा धकाः आशिका यानाः सुभाय् देछाना च्वना ।

थथेहे चन्दादातापिं दत धाःसा वाकी दनिपिं च्याम्ह तथागत पिनि (फुस्स बुद्धं निसें गौतम बुद्ध तक) संक्षिप्त जीवनी उल्लेख ज्वीगु “संक्षिप्त बुद्ध वंश तेश्रो भाग” नं

याकनं प्रकाशनं ज्वी धयागु भलसा कयाच्चना ।

थुगु सफू इलेहे छापे यायगुली गुहाली ब्यूगुलिं
ज्योति प्रिन्टिङ्ग प्रेसयात नं साधुवाद दु ।

धम्मवती, सासन धज धम्माचरिय
धर्मकीर्ति विहार
वि.सं. २०५४ कार्तिक



(घ)

विषय - सूची

विषय	पृष्ठ
१. वर कल्प	
- पदुम बुद्ध	१
- गौतम बुद्ध ज्वीम्ह बोधिसत्त्व	५
२. वर कल्प	
- नारद बुद्ध	७
- गौतम बुद्ध ज्वीम्ह बोधिसत्त्व	११
३. सार कल्प	
- पदुमुत्तर बुद्ध	१३
- गौतम बुद्ध ज्वीम्ह बोधिसत्त्व	१८
४. मन्द कल्प	
- सुमेध बुद्ध	२०
- गौतम बुद्ध ज्वीम्ह बोधिसत्त्व	२४
५. मन्द कल्प	
- सुजात बुद्ध	२६
- गौतम बुद्ध ज्वीम्ह बोधिसत्त्व	३०

६. वर कल्प	
- पियदस्सी बुद्ध	३२
- गौतम बुद्ध ज्वीम्ह बोधिसत्त्व	३७
७. वर कल्प	
- अट्टदस्सी बुद्ध	३९
- गौतम बुद्ध ज्वीम्ह बोधिसत्त्व	४४
८. वर कल्प	
- धम्मदस्सी बुद्ध	४७
- गौतम बुद्ध ज्वीम्ह बोधिसत्त्व	५२
९. सार कल्प	
- सिध्दत्थ बुद्ध	५४
- गौतम बुद्ध ज्वीम्ह बोधिसत्त्व	५९
१०. मन्द कल्प	
- तिस्स बुद्ध	६१
- गौतम बुद्ध ज्वीम्ह बोधिसत्त्व	६७

वर कल्प

११. पदुम बुद्ध

पदुम बुद्ध नीच्याम्ह तथागतपिं मध्ये भिंछम्हम्ह
बुद्ध खः । अनोमदस्सी बुद्धं आपालं प्राणीपिन्त उद्धार याय
धुंकाः वसपोल परिनिर्वाण जुयाविज्यात । बुद्धशासन लोप
जुसेलिं कथहनं संसारे अधार्मिक ज्या बढे जुयावन ।
मनूतयग्गु आयूनं १ लाख वर्षं घटे जुया ववं १० वर्षतक
थ्यन । थुगु अवस्थाय् तिनि मनूतय् चित्तय् धर्म चेतना
दनावयाः आयू बढेजुजुं हानं असंख्य वर्षया आयू जूवन ।
मनूतयग्गु चरित्र बांमलाना वःलिसे इमिगु आयूनं असंख्य
वर्षं घटेजुजुं १ लाख वर्षं दुबले तुसिता भुवने च्वना
विज्याःम्ह पदुम बोधिसत्वयात देवतापिसं मनुष्यलोके जन्म
काविज्याय्त्त प्रार्थना यात । पदुम बोधिसत्त्वं पञ्चमहावि-
लोकन * (काल, देश, द्वीप, कूल, मातु आयू परिच्छेद) यात
स्वयाः तुसिता भूवनं मनुष्य लोकया चम्पक धयागु देशे
कुहाँ विज्यानाः असम धयाम्ह जुजुया अग्र महारानी
असमादेवीया गर्भे च्वं विज्यात । भिला प्वाथे च्वनाः
चम्पक धयागु वगैचाय् बैशाख पुन्ही खुन्हु वसपोल जन्म
जुयाविज्यात । पदुम बोधिसत्त्व जन्म जूबले आकासं अनेक

* पञ्चमहाविलोकनया अर्थ संक्षिप्त बुद्ध वंश प्रथम भागे उल्लेखित
जुयाच्चंगु दु ।

प्रकारया पलेस्वाँ वा गाःगुलिं वसपोलयात महापदुम धकाः
नां छुता कथहनं वसपोल तःधिकः जुयावसेलि वसपोलयात
स्वंगू ऋतुयात ज्याय् लगेज्वीक स्वंगू दरवारत थुकथं नां
तयाः दनाविल ।

१. नन्दुत्तर दरवार
२. वसुत्तर दरवार
३. यसुत्तर दरवार

पदुम बोधिसत्त्वं उत्तरादेवी धयाम्ह युवराज्ञी प्रमुख
मेपिं ३३ हजार सेविकापिं सहित थुगु स्वंगू दरवारे १०
हजार वर्षतक लौकिक सुख भोग यानाविज्यात ।
वसपोलया उत्तरा देवीया पाखें रम्म धयाम्ह काय् छम्ह नं
दत । पुत्र लाभ ज्वीसाथं मनय् विरक्त भाव उत्पन्न जुयाः
वसपोल वगैँचाय् चाह्यू विज्याःबले प्यंगू निमित्त (बुढा-
बुढी, सीम्ह मनू, रोगीम्ह मनू व त्यागीम्ह मनू) खनाः
वसपोलया भनय् तसकं हे भय उत्पन्न जुल । संसार
खनाः विरक्त जुयाः पदुम बोधिसत्त्व आजानी धयाम्ह सलं
साय्कूगु रथे च्वनाः गृहत्याग याना विज्यात । वसपोल
नाम मेपिं १ करोड मनूतय्सं नं गृहत्याग यानाः ल्यू ल्यू
पिहाँवन । थुपिँहे मनूतनापं वसपोल बोधिसत्त्वं ८ ला तक
न्दुष्कर चर्या यानाविज्यात । छन्हु विशाख नक्षत्रे
वैशाखपुन्ही खुन्हु पदुम बोधिसत्त्वं धन्यवती देशे च्वंम्ह
सुधन्यवती धयाम्ह मय्जुं दान ब्यूगु क्षीर भोजन भपाः

विज्यानाः तिष्ठक आजिवकं ब्यूगु ८ म्हू घाँय्
 कयाःवालाचिमा (शोनणा वृक्ष) धयागु बोधि वृक्षया क्वय्
 लाया विज्यावले ३८ कु हाकःगु आशन प्राप्त जुल ।
 उखुन्हू हे वहनी घो मवीनिवं पञ्चमारयात दमन यानाः
 छसिकथं बोधिज्ञान प्राप्त यानाविज्यात । बोधिज्ञान प्राप्त
 ज्वी धुंकाः पदुम तथागत बोधिवृक्ष सिमाया जःखः
 बोधिज्ञानयात विचाः यायां न्हेन्हू न्हेन्हू न्हय्थाय्
 सप्तसप्ताह (४९दिन) विते यानाविज्यात । अट्टम सप्ताह
 दुखुन्हू पदुम तथागतं बोधिज्ञान सुयात कने माली धकाः
 थःगु ज्ञानं स्वयाविज्याःवले संसारया मनूतय् चित्तय् लोभ,
 द्वेष , मोह आदि क्लेशत वःवः ख्वात्तुक भुनाच्चंगु खनाः
 थज्यापिं अज्ञानीतय्सं गम्भीर व सुक्ष्म बोधिज्ञान गथेयानाः
 थ्वीकी धैथें निराश जुयाविज्यात । थुगु अवस्थाय् ब्रह्मा
 वयाः वसपोलयात संसारे क्लेश ख्वात्तुपिं जक मखु क्लेश
 सालुपिं मनूत नं दुगु जानकारी वियाः बुद्धं प्राप्त याना-
 विज्याःगु बोधिज्ञान जगत संसार उद्धार याय्गु लागि धर्म
 देशना यानाविज्याय्त प्रार्थना याःवल । ब्रह्माया
 प्रार्थनायात स्वीकार याना बुद्धं थःगु अनागतंश ज्ञानं
 सुयात धर्म देशना याय्माली धकाः स्वया विज्यावले
 वसपोल नाप नापं गृहत्याग यानाः पिहांवःपिं १ करोड
 मनूतय्त धन्यवती देशय् धनञ्चय धयागु वगैचाय् खंका

विज्यात । अले पदुम बुद्ध आकाश मार्गं हे व्वयाः उगु
 बगैचाय् थ्यंकाः इमित धर्मचक्र सूत्र देशना यानाविज्यात ।
 उपिं १ करोड मनूतसें चतुआर्य सत्य अमूल्य ज्ञानयात
 लाभ यानाकाल ।

थुकथं पदुम बुद्धं देशं-देशय् गामं गामय् धर्म
 प्रचार यानाविज्यात । कथहनं वसपोलया शिष्यपिं छम्ह थे
 छम्ह ज्ञानं पूर्णपिं व सःस्यूपिं जुयावल । उकें वसपोलं थः
 शिष्यपिं मध्ये ज्ञानं च्वेलापिन्त थुकथं अग्र पदवि विया
 विज्यात ।

पदुम बुद्धया अग्रश्रावक भिक्षुपिं - साल भिक्षु व उपशाल
 भिक्षु

पदुम बुद्धया अग्रश्रावीका भिक्षुणीपिं- राधा थेरी व सुराधा
 थेरी

पदुम बुद्धया नीजी सेवक - वरुण भिक्षु

पदुम बुद्धया मुख्यपिं उपासकपिं - भिय्यो व असम

पदुम बुद्धया मुख्यपिं उपासिकापिं- सुचिदायी व नन्दारामा

पदुम बुद्धया म्ह धिकः - ५८ कु हाकः

पदुम बुद्धया रश्मि - सारा चक्रवाले फैले जु ।

वसपोल पदुम बुद्ध मनूतय्गु आयू १ लाख वर्ष
 दुबले जन्म काः विज्याःम्ह खः।

गौतम बुद्ध ज्वीम्ह बोधिसत्व

पदुम बुद्धया पाले गौतम बुद्ध ज्वीम्ह बोधिसत्व द्यो सिंह *राज जुयाच्चन । छन्हु पदुम बुद्ध तसकं न्ह्यइपुसे च्वंगु जंगले ७ न्हु तक निरोध समापत्ति ध्यानय् च्वना विज्याःगु अवस्थाय् बोधिसत्व सिंह नं अन थ्यंकः विज्यात । बुद्धयात खनेवं द्यो सिंहया मन तसकं लय्ताल । वसपोल बुद्धप्रति दुनुगलं निसें श्रद्धा पिज्वल । उम्ह सिंहं उगु अनकन्टार जंगले मेमेपिं हिंस्रक जनावरतय्सं ध्यानय् च्वनाविज्याःम्ह बुद्धयात आक्रमण याःवय्फु धकाः पीर कयाः नसा हे माःमवसे बुद्धयाथाय् ७ न्हु तक हे पिवाः च्वनाच्चन । बुद्धप्रति सुद्धगु श्रदादुगु प्रितिं बोधिसत्वया नय् पित्याः नं मजू । ७ न्हु दुखुन्हु पदुम बुद्ध निरोध समापत्तिं दना विज्याःवले बुद्धं उम्ह द्यो सिंहया श्रदा खनाः प्रसन्न जुया विज्यात । अले वसपोल बुद्धं थुकथं स्वंगू अधिस्थान याना विज्यात ।

- १) शहरे च्वंपिं भिक्षुपिं जंगले वय्मा ।
- २) भिक्षुपिं वइवले सिंहखनाः मग्याय्मा ।
- ३) सिंहया नं भिक्षुपिं खनाः मन प्रशन्न ज्वीमा ।

* सिंह प्यंगू प्रकारयापिं दु । खिचा सिंह निगू प्रकारयापिं । द्यो सिंह निगू प्रकारयापिं । द्यो सिंह तयसं घाँय नै ला नैमखु । खिचा सिंहतयसं ला नै घाँय नैमखु ।

बुद्धया अधिस्थान अनुसार १ करोडं मयाक भिक्षुपिं
 जंगले थ्यंकः विज्यात । भिक्षुपिसं बुद्धयात वन्दना यायां
 छखे लिक्क फ्यतू विज्याःगु दृष्य स्वस्वं सिंहया मन तसकं
 प्रशन्न जुल । सिंहं बुद्ध प्रमुख सकल भिक्षुपिन्त फलफूल
 खानाहयाः नकेहल । थुकथं सिंहं श्रद्धापूर्वकं न्हेन्हु तक दान
 यात । सिंहयागु थज्याःगु श्रद्धा खनाः बुद्धं थ्व सु ज्वी धकाः
 अनागतंश ज्ञान स्वया विज्याःगु बखते उम्ह सिंह भद्रकल्पे
 शाक्य मुनी बुद्ध धाय्काः प्रख्यात ज्वीतिनिम्ह बोधिसत्व
 धकाः सीकाः थुगु खँ सिंहया न्ह्योने भविष्य बाणी याना
 विज्यात । बुद्धया पाखें थज्योगु भविष्य बाणी न्यनाः सिंह
 तसकं लय्तायाः बुद्धप्रति अभ् श्रद्धा क्वात्वीकाः मन
 पवित्र व उत्साहित यायां माःथाय् जन्म काःवन ।

Dhamma.Digital



वर कल्प

१२. नारद बुद्ध

नारद बुद्ध नीच्याम्ह तथागतपिं मध्ये भिंनिम्हम्ह
बुद्ध खः ।

पदुम तथागत परिनिर्वाण ज्वी धुंकाः बुद्ध शासन
लोप जुसेलि मनूतयगु पुचले धर्मचेतना धमाधम घटेजुजुं
वंगु कारणं इमिगु आयू १ लाख बर्षं घटेजुया ववं कमशः
१० वर्ष तक थ्यन । १० वर्ष आयू जूबले पापया कारणं
अनेक भय उत्पन्न जुयाः ग्यानाः हानं धर्म चेतना बृद्धी
याना हल । उकीया कारणं मनूतयगु आयू बढेजुजुं असंख्य
वर्षतक थ्यन । असंख्य वर्ष आयू दुपिं मनूतय मने अनित्य
बोध मजूगुलिं हानं पाप चित्तं थाय् काःगुया कारणं
सच्छिद्दंय दच्छिद्द आयू घटे जुजुं १ लाख बर्ष तक थ्यन ।
थुगु इलय् तुसिता भूवने च्वना बिज्याःम्ह नारद
बोधिसत्वयात देव ब्रह्मापिसं बुद्ध जुयाबिज्याय्त प्रार्थना
याःवल । देव ब्रह्मापिनिगु प्रार्थनायात ध्यान तथाः वसपोल
बोधिसत्वं पञ्च महाविलोकन (काल, देश, द्वीप,कूल,
मातुआयू परिच्छेद) यात स्वयाः मनुष्य लोके थुपिं न्यागू

तत्त्वतनं पुरेजुगु खंका विज्यात । उकें नारद वोधिसत्व
 धन्यवती देशय् राज्य यानाच्चंम्ह जुजु सुदेवया
 अग्रमहारानी अनोमा देवीया गर्भे च्वंविज्यात । कथहनं
 भिला फूगु दिने वैशाख पुन्ही खुन्हु वसपोल धनञ्चय
 धयागु वगैचाय् जन्म जुया विज्यात । वसपोल वोधिसत्व
 जन्म जुया विज्याःगु दिने आकाशं वसः वा गाःगुलिं
 वसपोलयात नारद धका नामाकरण याःगु जुयाच्वन ।
 कथहनं नारद वोधिसत्व तःधिकः जुयावसेलि वसपोलयात
 मौसम अनुकुल च्वनाविज्याय्त् स्वंगू दरवार थुकथं
 नामाकरण यानाः दयकाविल ।

१) विजित दरवार

२) विजितावी दरवार

३) विजिताभीराम दरवार

नारद वोधिसत्वयात विजित सेना धयाम्ह युवराज्ञीनाप ९
 दोल सेवीकापिसं चाहवीकाः विवाह यानाविल । विवाह
 लिपा ९ हजार वर्ष तक स्वंगू दरवारे थः युवराज्ञी प्रमुख
 ९ हजार सेवीकापिनापं, पञ्चकाम सुख भोग याना-
 विज्यात । युवराज्ञी विजित सेनाया पाखें नन्दुत्तर धयाम्ह
 काय् छम्ह दसेलि वसपोलया मने सांसारिक भय खनाः
 ग्यासेवल । अले हानं छन्हु चाट्यु विज्याःवले प्यंगू निमित्त
 (वुढा-वुढी, रोगी, सीम्ह व त्यागी) खनेवं संसार भय खनाः

भ्रन ग्याना वल । छन्हु वसपोल विरक्त जुयाः जपमा हीकु
 हीकुं न्यासि बिज्यानाः मंगल बगैचाय् थ्यनेवं थःगु सँ
 तरवारं त्वाःल्हानाः उगु सँ आकाशे वांछ्वयाबिज्यात । उगु
 क्षणे वसपोलं ब्रह्मां बीहःगु चीवर पुनाः उगुहे बगैचाय्
 प्रब्रजित जुयाबिज्यात । बोधिसत्वं चानाः वांछ्वया
 बिज्याःगु सँ व वसपोलया गृहस्थी वसः इन्द्रं कया यंकाः
 चैत्य दय्कातला बोधिसत्त्व प्रब्रज्या जुया बिज्याःगु सियाः
 वसपोल नापं मेपिं १ लाख मनूतनं ल्यूल् यू वयाः प्रब्रजित
 जुल । नारद बोधिसत्वं थुपिं १ लाख प्रब्रजित ब्यक्तिपिं
 नाप बगैचाय् ७ न्हु तक दुष्कर चर्या यानाबिज्यात ।
 वैशाख पुन्ही खुन्हु वसपोलयात विजीत सेना देवी युवराज्ञीं
 दान ब्यूगु क्षीर भोजन पीगुपे यानां भपाः बिज्यानाः
 सुदस्सन धयाम्ह बगैचा नायोनं ब्यूगु ८ म्हु घाँय्
 बालाचिमा (महाशाण बृक्ष) या क्वय् लायाब्यूबले ५८
 कुहाकःगु आशन उत्पन्न जुयाः द्यो मबीनिवं पञ्चमारयात
 दमन यानाः रात्रीया प्रथम प्रहरे पुब्बेनिवास ज्ञान, द्वितीय
 प्रहरे दिब्बचक्खु ज्ञान, तृतीय प्रहरे आसबक्खय ज्ञान प्राप्त
 यानाः बोधिज्ञान प्राप्त यानाः बुद्ध जुयाबिज्यात । बोधिज्ञान
 प्राप्त याना बिज्याय् धुंकाः वसपोलं प्राप्त यानाबिज्याःगु
 ज्ञानयात हानं बिस्तृत रुपं अध्ययन याय्गु लागि
 बोधिवृक्षमाया आसपासे न्हेन्हु न्हेन्हु न्हय्थाय् ४९ न्हु तक

सप्त सप्ताह विते याना विज्यात । अले अट्टम सप्ताह
खुन्हु थःम्हं प्राप्त यानागु ज्ञान सुयात कने माली धकाः
स्वयाविज्याःवले मनूतयगु चित्तय् ख्वात्तुक क्लेशं भुनातःगु
खंका विज्यानाः अज्याःपिसं थुगु गम्भिरगु ज्ञानयात थ्वीका
काय् फ़ैमखुगुलि निराश जुयाविज्यात । थ्व खँ वह्मां
सियाः वसपोलयात संसारे क्लेश ख्वातुपिं मनूतजक मखु
क्लेश सालुईधुकूपिं मनूत नं दुगु खँ कनाः प्राणीपिनि
उद्धार यायगु लागि धर्मदेशना यानाविज्यायत प्रार्थना
याःवल । ब्रह्माया प्रार्थना स्वीकार यासे वसपोलं आः
सुयात धर्म देशना याय् माली धकाः बुद्ध ज्ञानं स्वया
विज्याःवले थः नाप नापं प्रव्रजित जूपिं १ करोड
व्यक्तिपिन्त खंकाः धनञ्चय वगैंचाय विज्यानाः इमित
धर्मचक्र देशना यानाविज्यात । थुगु धर्मदेशना न्यना
आपालं देव मनुष्यपिसं अमृत ज्ञान लाभ यायत सफल
जुल । वसपोलं बोधीज्ञानयात गामं गामे देशं देशे प्रचार
यानाविज्यानाः वसपोलया आपालं श्रावक श्राविकापिं दत ।
नारद बुद्धया अग्र श्रावक भिक्षुपिं - भददशाल भिक्षु व
जितमित्त भिक्षु
नारद बुद्धया अग्र श्राविका भिक्षुणीपिं - उत्तरा भिक्षुणी
व भग्गुनी भिक्षुणी
नारद बुद्धया नीजि सेवक भिक्षु - वासेट्ट भिक्षु

नारद बुद्धया मुख्यिणं उपासकणिं - उगगरिन्द व वसभ
 नारद बुद्धया मुख्यिणं उपासिकाणिं - इन्दावरी व वन्दी
 नारद बुद्धया म्हधिकः - ८८ कु हाकः
 नारद बुद्धया रश्मि - छगू योजन तक
 फैलेजू

नारद बुद्ध मनूतयगु आयू ९० हजार वर्ष दुवले जन्म जुया
 विज्याःगु खः ।

गौतम बुद्ध ज्वीम्ह बोधिसत्व

नारद बुद्धया पाले गौतम बुद्ध ज्वीम्ह बोधिसत्व
 ऋषी जुयाः हिमालये आश्रम दयकाः लौकिक ध्यान
 अभिज्ञां पूर्ण जुयाविज्यात । नारद बुद्धं थुम्ह ऋषि
 बोधिसत्वयात करुणा तयाः ८० करोड अर्हन्त भिक्षुणिं व
 १ करोड अनागामी उपासकणिं व्वनाः हिमालये बोधिसत्व
 ऋषी नापलाः विज्यात । बुद्ध प्रमुख श्रावकणिं व
 उपासकणिं नं थःथाय् विज्याःगु खनाः बोधिसत्व ऋषी
 तसकं लय्तायाः श्रद्धा पूर्वक ऋध्दी वलं वाँलाक थाय्
 दयकाः च्वनेगु लागि थाय्या वन्दोवस्त यानाविज्यात ।
 उखुन्हु चच्छि तक बुद्धनाप धर्मया विषये छलफल याना-
 विज्यात । कन्हे खुन्हु ऋध्दी वलं उत्तरकुरुद्धीपय् भिक्षा
 विज्यानाः बुद्ध प्रमुख श्रावक संघणिं व उपासकणिंत तकनं

भोजन दान यात । थुगु हे तरिकां तसकं श्रद्धापूर्वक ७ न्ह
 तक थःगु ऋद्धिबलं भोजन याकाः बुद्ध प्रमुख सकल भिक्षु
 व उपासकपिन्त लहिनातल । वसपोल बोधिसत्व ऋषिं
 नारद बुद्धया लागि श्रृखण्डया विहार छगू नं दय्का-
 बिज्यात । ऋषी बोधिसत्वया श्रद्धा खनाः बुद्धं थ्व सुज्वीमह
 धकाः अनागतंश ज्ञानं स्वया बिज्याःबले भद्र कल्पे गौतम
 गोत्रय् शाक्य कूलय शाक्य मुनी बुद्ध धाय्काः प्रख्यात
 ज्वीतिनिमह धकाः खंका बिज्यात । भोजन दान याय्गु
 अन्तिमगु दिन अर्थात् न्हेन्हु दुखुन्हु नारद बुद्ध वसपोल
 ऋषी बोधीसत्व भद्रकल्पे शाक्यमुनी बुद्ध धाय्काः प्रख्यात
 ज्वीतिनिमह व्यक्तिया रुपे भविष्य बाणी यानाबिज्यात ।
 बोधिसत्व ऋषिं वसपोलया बारे बुद्ध ज्वीगु भविष्य बाणी
 न्यने धुंकाः तसकं खुसी जुया बिज्यात । कन्हेहे बुद्ध ज्वीमह
 थें च्वंक लय्तायाः जीवनकाछी तक दश पारमी धर्मयात
 पालेयायां च्यागू समापति व न्यागू अभिज्ञान लाभयानाः
 ब्रह्म लोके जन्म काः बिज्यात ।



सारकल्प

१३. पदमुत्तर बुद्ध

पदमुत्तर बुद्ध नीच्याम्ह तथागतपिं मध्ये
भिक्षुस्वम्हम्ह बुद्ध खः ।

नारद बुद्धं थःगु जीवन दत्तले धर्म प्रचार यानाः
परिनिर्वाण जुया विज्यासेलि बुद्ध शासन लोप जुयाः
छ्सीकथं लोभ व क्रोधया कारणं आयू घटे जुजुं मनूतयगु
आयू १० दँ थ्यंकाः कल्प नाश जुल । अनंलिं असंख्य
सून्यकल्प तक पारमी पुरेजूपिं बोधिसत्वपिं मदुगु कारणं
बुद्धपिं उत्पन्न जुया विमज्याः । कथहनं असंख्य सून्यकल्प
नं नाश जुजुं सार कल्प उत्पन्न जुल । सार कल्पय्
मनूतयगु आयू असंख्य वर्षं निसें सच्छि दँय् दच्छि आयू
घटे जुजुं १ लाख वर्ष तक थ्यन ।

पदमुत्तर बोधिसत्व उगु अवस्थाय् तुसिता भूवने
चवना विज्याःबले देव ब्रह्मापिसं मनूष्यलोके बुद्ध
जूबिज्याय्त प्रार्थना याःगु कारणं थःम्हं नं पञ्च
महाविलोकन (काल, देश, द्वीप, कूल, मांतु आयू परिच्छेद)
यात स्वया विज्यानाः तुसिता भूवनं हंसावती देशय्
आनन्द जुजुया कूले सुजातादेवी धयाम्ह अग्रमहारानीया

गर्भे च्चं विज्यात । भिला पुरा दय्व वसपोल वैशाख पुन्हीया दिनय् हंसावती धयागु हे वगैचाय् जन्म जुयाविज्यात । वसपोल पदुमुत्तर बोधिसत्त्व जन्म जुया विज्याःवले आकाशं पलेस्वां वा गाःगुलिं वसपोलया नां पदुमुत्तर धकाः नामाकरण जूवन । वसपोल जन्म ज्वीसाथ आपालं धार्इत तयाः स्याहार सुसार याय्गु वन्दोवस्त जुल । कथहनं पदुमुत्तर बोधिसत्त्वया वैश जाया वसेंलि वसपोलयात मौसम अनुसार ल्वय्क च्वनेत स्वंगू दरवार थुकथ नां तयाः दय्काविल ।

१) नरवाहन दरवार

२) यसवाहन दरवार

३) वसवति दरवार

पदुमुत्तर बोधिसत्त्वयात वसुदत्ता देवी युवराज्ञी प्रमुख १ लाख व २० हजार सेविकापिंसं चाह्वीकाः विवाह यानाविल । वसपोल बोधिसत्त्व वसुदत्ता देवी सहित १ लाख २० हजार सेविकापिं नाप उगु स्वंगू दरवारे १० हजार वर्षतक लौकिक सुख भोग यानाविज्यात । अले वसुदत्ता देवी पाखें उत्तर धयाम्ह काय् छम्ह दसेंलि वसपोलया मनय् विरक्त भावं जायावल । छन्हु बगैचाय् चाःह्यूविज्याबले वसपोलं प्यंगु निमित्त (बुढा- बुढी, रोगी, सीम्ह व त्यागी) खन । प्यंगू निमित्त खंसां निसें

वसपोलया मन भूत विरक्त जुल । पलेस्वां थ्वयाहयाः पूगु
 त्वहंतय् तय्वले गथे याता प्याता वनीगु खः अथेहे पदुमुत्तं
 वोधिसत्त्वं प्यंगू निमित्त खनेसाथं ग्यानाः याता-प्याता
 वन । वसवती दरवारे च्वनाच्चना विज्याःबले वसपोल
 तसकं विरक्त जूगु कारणं शोभित बोधिसत्त्वं थें वसवती
 दरवार नापं ल्हवनाः बोधिवृक्षमाया क्वय् दिकेयंकाः
 गृहत्याग यानाविज्यात । उथाय्लाक देव ब्रह्मापिसं वीहःगु
 चीवर पुनाः गृहस्थी वसः त्याग यानाः बोधिवृक्ष सिमाक्वय्
 च्वं विज्यात । दरवारे दुने च्वंपिं मनूत फुक्कस्यां थःथःगु
 गृहस्थी वसः त्याग यानाः त्यागी जुल । अले दरबार छगू
 जक खालिं लिहॉवनाः न्हापायाथाय् थ्यंकःवन । बोधिसत्त्व
 सहित नापं त्यागी जूपिं सकलें जानाः न्हयन्हु तक दुष्कर
 चर्या यानाविज्यात । बैशाख पुन्ही खुन्हु उज्जयनी धयागु
 निग्रमे च्वंम्ह रुचानन्दा धयाम्ह मय्जुं क्षीर भोजन दान
 याःगु ४९ प्ये यानाः भपाः विज्यानाः सुचित्त धयाम्ह
 आजिवकं दान व्यूगु च्याम्हू घॉय् थेस्यूपें मा (शाल वृक्ष)
 धयागु वोधिवृक्षमाया क्वय् लायाब्युबले ३८ कु हाकःगु
 आशन उत्पन्न जुल । उगु आशनय् बोधिसत्त्वं प्यंगू
 वीर्ययात न्हयोने तयाः (लाहि गनावंसां, क्वँय चूचूं दंसां,
 हिनु च्ववूसां) बोधिज्ञान लाभ मज्जीकं थुगु आशनं दनेहे
 मखु धयाम्गु अधिस्थान याना फ्यतुना विज्यात । आशनय्

फ्यतुना विज्याय् धुंकाः द्यो निभाः मवीनिवं वःगु
पञ्चमारयात त्याका विज्यात । अले छसीकथं रात्रीया
प्रथम याम, द्वितीय याम व तृतीय यामे क्रमशः
पुव्वेनिवास ज्ञान, दिव्वचक्खु ज्ञान व आसवक्खय ज्ञान
प्राप्तयानाः अन्तिम प्रहरे बोधिज्ञान प्राप्त यानाः बुद्ध
जुयाविज्यात ।

बोधिज्ञान प्राप्त यानाविज्याय् धुंकाः बोधिबृक्षमाया
आसपासे न्हेन्हु न्हेन्हु न्हय्थाय् च्वनाः सप्तसप्ताह (४९
दिन) तक बोधिज्ञानया वारे अनुलोम प्रतिलोम यानाः
विचाः यानाविज्यात । ४९ न्हुतक छुं हे भपिया मविज्यासे
बोधिज्ञानया वारे विचाः याय् सिधयाः सम्पूर्ण ज्ञान लाभ
ज्वी धुसेंलि थःत प्राप्त जूगु आहार सेवन यानाविज्याय्
धुंकाः वसपोलं प्राप्त यानाविज्याःगु ज्ञान सुयात कने माली
धकाः बुद्ध ज्ञानं स्वयाविज्यात । थथे स्वया विज्याःवले
संसारय् मनूतयगु चित्तय् ख्वात्तुगु क्लेशं जक भुनातःगु
खंकाविज्यात । थथे क्लेश ख्वातुपिसं बोधिज्ञानयात याकनं
थ्वीके फैमखुगु कारणं बोधिसत्व तसकं निराश
जुयाविज्यात । थुगु समये ब्रह्मलोकं ब्रह्मा
कुहाँवयाःलोकय् क्लेश सालुपिं मनूतनं दुगुलिं इमितहे
जूसां थुगु अमूत्य बोधिज्ञानया वारे धर्म देशना याना
विज्याय्त प्रार्थना याःवल । ब्रह्माया प्रार्थनायात स्वीकार

यासे सुयात धर्म देशना याय्माली धकाः बुद्ध ज्ञानं हानं
छकः स्वयाविज्याःबले वसपोलया चिरिमांया काय्पिं
किजापिं देवल राजकुमार व सुजात राजकुमारयात खंका
विज्यात । अले वसपोल आकाश मार्गं ब्वयाः मिथिला
धयागु बगैचाय् कुहाँ बिज्यानाः बगैचा थुवाःयात
वसपोलया किजापिं देवल व सुजातयात सःतके छ्वयाः
इपिं प्रमुख आपालं मनूत, देव ब्रम्हापिं दुथाय् धर्मचक्र
देशना यानाबिज्यात । धर्म देशना न्यनाः आपालं देव
मनुष्यपिंसं धर्मज्ञान लाभ यानाः मार्गफल प्राप्त याना-
काल । थुकथं गामं गामे नगरं नगरे धर्म देशना यायां
वसपोल पदुमुत्तर बुद्धया आपालं श्रावक श्राविकापिं दत ।
पदुमुत्तर बुद्धया अग्रश्रावक भिक्षुपिं-देवल भिक्षु व सुजात
भिक्षु

पदुमुत्तर बुद्धया अग्रश्राविका भिक्षुणीपिं-अमीता थेरी
असमाथेरी

पदुमुत्तर बुद्धया नीजिसेवक भिक्षु-सुमन भिक्षु

पदुमुत्तर बुद्धया मुख्यपिं उपासकपिं-वितिन्न व तिस्स

पदुमुत्तर बुद्धया मुख्यपिं उपासिकापिं-हत्थदायी व विचिता

पदुमुत्तर बुद्धया म्ह धिकः -५८ कु हाकः


वसपोल पदुमुत्तर बुद्ध मनूतय्गु आयू १ लाख वर्ष दुबले
जन्म काःबिज्यागु खः ।

पदमुत्तर बुद्ध नन्दाराम बगैचाय् परिनिर्वाण जुया
 बिज्याःगु खः । परिनिर्वाणं लिपा अग्नि संस्कार याःबले
 वसपोलया अस्थि तःग्वःगु ग्वारा जुयाः ल्यन । मनूतसें उगु
 अस्थि तयाः १२ योजन दुगु चैत्य दय्काः भक्ति यात ।
 थुगु चैत्यं न्हि न्हिं रश्मि पिहां वइगु जुयाच्चन । पदमुत्तर
 बुद्धया पाले वसपोलया पाखें धर्मदेशना न्यनाः आपालं
 मनूत तरेजूथें वसपोल बुद्धया ५८ कु हाकःगु म्हधिकःया
 छग्वारा अस्थि गर्भे तयाः दय्कूगु चैत्यं चा न्हि हे
 सीमदय्क जाहाँ थीक रश्मि पिहाँ वयाच्चंगु चैत्य दर्शन
 यायां हे आपालं मनूत तरे जूगु जुयाच्चन । उलि जक
 मखु उगु समये मिथ्या दृष्टी लाःपिं मनूत आपाः मदुगु
 जुयाच्चन ।

गौतम बुद्ध ज्वीम्ह बोधिसत्व

पदमुत्तर बुद्धया पाले गौतम बुद्ध ज्वीम्ह बोधिसत्व
 यक्को सम्पत्ति दुम्ह जटिल महाजन जुयाच्चन । वसपोलं
 सुमेघ पण्डितया जन्मं निसें आपालं दान पारमी
 पुरेयानावःगु कारणं तसकं तःधंम्ह महाजन ज्वीदुगु
 जुयाच्चन । छन्हु पदमुत्तर बुद्धया पाखें वाखें न्योवले तसकं
 श्रद्धा उत्पन्न जुयाः तथागत सहित भिक्षुसंघयात ७ न्हु
 तक भोजन याकाः चीवर दान बिल । जटिल बोधिसत्वया

तसकं क्वातुगु श्रद्धा खनाः पदुमुत्तर तथागतं थुम्ह महाजन
सु ज्वी धकाः थःगु अनागतंस ज्ञानं स्वयाबिज्याःबले
भद्रकल्पे गौतम गोत्रय् शाक्य कूले गौतम बुद्ध धायकाः
प्रख्यातम्हं बुद्ध ज्वीतिनिगु सियाः भोजन अनुमोदनं लिपा
बुद्धं जटील बोधिसत्त्व भद्रकल्पे बुद्ध ज्वीतिनिगु खँ
भविष्यबाणी यानाबिज्यात । तथागतया पाखें थज्याःगु
भविष्यवाणी न्यने दयाः जटिल महाजनया श्रद्धा भन बृद्धी
जुयावल । वसपोलं बुद्धया सेवा यायां दानधर्म यानाः
देवलोके जन्म काःबिज्यात ।



Dhamma.Digital



मन्द कल्प

१४. सुमेध बुद्ध

सुमेध बुद्ध नीच्याम्ह तथागतपिं मध्ये भिंप्यम्हम्ह बुद्ध खः।

पदमुत्तर बुद्ध लोके उत्पन्न जुयाः वसपोलया परिनिर्वाणं लिपा सारकल्प स्यने धुंकाः ७० हजार कल्प तकला सून्य कल्प जक वयाच्वन । कथहनं सून्य कल्प फुनावनाः हानं मन्द कल्प छगू उत्पन्न जुल । थुगु कल्पे निम्ह बुद्ध छसीकथं थुकथं उत्पन्न जुयाविज्यात ।

१) सुमेघ बुद्ध

२) सुजात बुद्ध

मन्द कल्प उत्पन्न जुयाः मनूतयगु आयू असंख्य वर्ष दयाच्वंबले कथहनं मनूतेसं संसारया अनित्य स्वभावयात म्हसीके मफयाः इमिगु चित्ते राग, द्वेष, मोह बढे जुजुं कथहनं इमिगु आयू सच्छिदैय् दच्छि घटेजुयाः आखिरय् ९० हजार वर्ष थ्यंकःवल । थुबले तुसिता भूवने च्वना-च्वना विज्याम्ह सुमेघ बोधिसत्त्वयात देवतापिसं मनूष्यलोके बुद्ध जुयाविज्याय्त प्रार्थना याःवल । देवता पिनि प्रार्थना न्यनाः वसपोलं पञ्चमहाविलोकन (काल,देश,

द्वीप, कूल, मातु आयू परिच्छेद) यात विचाःयानाः मनूष्य लोके थुगु न्यागू तत्त्वत पुरेजुगु सीका विज्यात । अले वसपोल बोधिसत्त्व तुसिता भूवनं कुहाँ विज्यानाः मनूष्यलोकया सुदस्सन देशे सुदत्त धयाम्ह जुजुया अग्रमहारानी सुदत्ता देवीया गर्भय् च्वंविज्यात । भिला पुरा दसेलि वसपोलयात मौसम अनुसार च्वनाविज्याय्त थुकथं नां दुगु स्वंगू दरवारत दयकाबिल ।

१) सुचन्दन दरवार

२) कन्चन दरवार

३) सिरिवड्ढन दरवार

वसपोलयात सुमना देवी युवराज्ञी प्रमुख ४८ हजार सेविकापिसं घेरेयाकाः विबाह यानाबिल । युवराज्ञी व सेविकापिं नाप स्वंगू दरबारे ९ हजार वर्ष तक लौकिक सुख भोग यानाविज्यात । सुमना देवी युवराज्ञीया पाखें पुनब्बसुमित्त धयाम्ह काय् छम्ह दसेलि सुमेघ बोधिसत्त्वया मने तसकं बैराग्य चित्त उत्पन्न जुल । छन्हु बगैचाय् चाःट्यू विज्याःबले वसपोलं प्यंगू निमित्त (बुढा-बुढी, रोगी, सीम्ह, त्यागी) खँसां निसेंला वसपोलं गुलिनं लौकिक सुख भोग यानाविज्याःगु खः थुपिं फुक्कं अशुभ खनी धकाः थ्वीका विज्यानाः विरक्त जुयाः किसी म्हय् च्वनाः गृहत्याग यानाविज्यात । बोधिसत्त्व सुमेघ कुमारं गृहत्याग याना-

विज्याःगु खनाः वसपोलया ल्यू ल्यू सच्छिगू करोड मनूतेसं
 नं गृहत्याग यानाः प्रब्रजित जुयावन । सुमेघ बोधिसत्त्वं १५
 दिन तक दुष्कर चर्या यानाविज्यात । छन्हु बैशाख पुन्ही
 खुन्हु नकुल धयागु निग्रमे च्वंम्ह नकुल सेंठया म्हयाय्त्नं
 दान ब्यूगु क्षीर भोजन पीगुप्ये याना भपाः विज्यात ।
 अथेहे सिरीवड्ठ धयाम्ह आजिवकं दान ब्यूगु च्याम्हू घाँय्
 दान कयाः नीहःमा (महाकदम्ब बृक्ष) धयागु बोधिबृक्षमाया
 क्वय् लायाः प्यंगू बीर्य न्हयोने तयाः (ला हि सुकूगंसां,
 क्वँय् चूं चूं दसां, हिनू हे चब्बूसां) बोधिज्ञान प्राप्त
 मज्जीकं थ्व थासं दनावने मखु धकाः अधिस्थान यानाः
 फ्यतुनाविज्यात । द्यो मबीनिवं पञ्चमारयात त्याकाः
 रात्रीया प्रथम, द्वितीय व तृतीय यामे छसीकथं
 पुब्बेनिव्वास ज्ञान, दिब्बचक्खु ज्ञान व आसवक्खय ज्ञान
 यात प्राप्त यानाः द्यो तुई तुई धाःथे च्वंबले बोधिज्ञान
 लानाः बुद्ध जुयाविज्यात । बोधिज्ञान प्राप्त ज्वीधुंकाः ४९
 न्हु सप्त सप्ताह तक छुंहे आहार सेवन याना मत्रिज्यासे
 वसपोलं प्राप्त यानाविज्याःगु बोधिज्ञानयात सप्तसप्ताहतक
 बुद्ध गयाया आसपासे अनुलोम प्रतिलोम (च्वं निसें
 क्वथ्यंक् क्वं निसें च्वे थ्यंक्) विचाः याना च्वनाविज्यात ।
 ४९ न्हु लिपा बोधिज्ञानया बारे विचाः याय्गु ज्या सम्पूर्ण
 रुपं सिधयकाः थःत प्राप्त जूगु आहार सेवनं लिपा वसपोलं

प्राप्त यानाविज्याःगु ज्ञान सुयात धर्म देशना याय्माली
 धकाः बुद्ध ज्ञानं स्वयाविज्याःगु बखते संसारया मनूतय
 नुगले ख्वात्तुक क्लेशं भुनातःगु खंकाः थुज्याःपिसं अमूल्यगु
 बोधिज्ञानयात गय्यानाः ध्वीकी धकाः निराश जुया
 विज्यात । बुद्ध निराश जुया विज्याःगु खँ ब्रह्मां सीकाः
 बुद्धयात संसारे क्लेश ख्वातुपिं जक मखु क्लेश सालुपिं
 मनूत नं आपालं दनिगु सुचं बियाः धर्मदेशना याना
 विज्यायूत प्रार्थना याःवल । ब्रह्माया प्रार्थना न्यनाः सुमेध
 बुद्धं सुयात धर्म देशना याय्माली धकाः थःगु ज्ञानं स्वया
 विज्याःबले वसपोलया चिरिमांया कायूपिं (किजापिं) निम्ह
 शरण राजकुमार व सब्बकाम राजकुमारयात खंका
 विज्यात । अले वसपोल आकाश मार्गं सुदस्सना देशया
 लिक्क सुदस्सना धयागु हे मंगल बगैंचाय् विज्यात ।
 बगैंचा थुवाःयात थः किजापिं सःतके छ्वयाः शरण
 राजकुमार व सब्बकाम राजकुमार सहित थःनापं गृहत्याग
 यानावःपिं आपालं मनूतयूत धर्मचक्र प्रवर्तन याना-
 विज्यात । थुकथं गामं गामे देशं देशे धर्मप्रचार यायां
 सुमेध बुद्धया आपालं श्रावक श्राविकापिं दत ।

सुमेध बुद्धया अग्रश्रावक भिक्षुपिं-शरण भिक्षु व सब्बकाम
 भिक्षु ।

सुमेध बुद्धया अग्रश्रावीका भिक्षुणीपिं-रामा भिक्षुणी व
सुरामा भिक्षुणी

सुमेध बुद्धया नीजी सेवक भिक्षु-सागल भिक्षु

सुमेध बुद्धया मुख्यपिं उपासकपिं-उरुवेल व यशवा

सुमेध बुद्धया मुख्यपिं उपासिकापिं-यशोधरा व सिरीमा

सुमेध बुद्धया म्हधिक -८८ कुहाकः

सुमेध बुद्धया रशमी -छ्रगू योजन तक फैलेजू ।

सुमेध बुद्ध मनूतयूगु आयू ९० हजार बर्ष दुबले
जन्म जूबिज्याःगु खः ।

गौतम बुद्ध ज्वीम्ह बोधिसत्त्व

सुमेध बुद्धया पाले गौतम बुद्ध ज्वीम्ह बोधिसत्त्व
उत्तर मानवक ब्राह्मण जुयाच्चना वसपोल बोधिसत्त्व
गुबलें देवलोक गुबलें मनूष्यलोक व गुबलें हीनगु
तिरिश्चिन योनी जन्म कयाः चाःह्यु ह्युं थुगु जन्मे तसकं
ध्यवा दुम्ह महाजनया कायूम्चा उत्तर धयाम्ह महाजन
पुत्र जुयाच्चन । वसपोलया सम्पत्ति जक हे ८० गु कोटी
दु । सुमेध बुद्ध उत्पन्न जूगु खबर न्यनाः तसकं श्रद्धापूरवक
वसपोल बुद्ध नापलानाः बाखँ न्यनाः बुद्ध सहित भिक्षु
संघपिन्त ७ न्हुतक भोजन निमन्त्रणा यात । ७ न्हुतक
भोजन याकाः भोजन अनुमोदन बाखँ न्यने धुंकाः संसारया

स्वभाव धर्म ध्वीकाः बुद्धयाके त्यागी ज्वीगु अनुमती कयाः
 थःगु गृहस्थाश्रम व फुक्क श्रीसम्पत्ति नं त्याग यानाः भिक्षु
 जूवल । उत्तर भिक्षुया शील स्वभाव व श्रद्धाखनां सुमेध
 बुद्धं थ्व सु ज्वीमह धकाः अनागतंश ज्ञानं स्वया बिज्याःबले
 वसपोल बोधिसत्त्व भद्रकल्पे गौतम गोत्रय् शाक्य कूले
 शाक्य मुनी बुद्ध धायकाः प्रख्यात ज्वीतिनिमह धकाः सीका
 बिज्यात । अल सुमेध बुद्धं उत्तर भिक्षुया न्ह्योने थुगु
 भविष्य बाणी नं यानाबिज्यात । सुमेध बुद्धया पाखें उत्तर
 भिक्षुया भविष्य बाणी न्यना बिज्याय्वं वसपोल
 बोधिसत्त्वया मनय् धर्मया प्रति उत्साह भन बढे जुजुं दान
 शील भावना बृद्धि यायां त्रिपीटक अध्ययन यायां लौकिक
 ध्यानं पूर्ण जुयाः ब्रह्मलोके जन्म काःबिज्यात ।

Dhamma.Digital



मन्द कल्प

१५. सुजात बुद्ध

सुजात बुद्ध नीच्याम्ह तथागतपिं मध्ये भिन्न्याम्हम्ह
बुद्ध खः ।

सुमेध बुद्ध परिनिर्वाणं लिपा मनूतयगु आयू ९०
हजार वर्षं घटे जुजुं १० वर्षं तक थ्यंवन । हानं धर्म
चित्त दुपिनि पाखें आयू यक्को दुपिं मचात बुइकाः आयू
बढे जुजुं १० वर्षं असंख्य वर्षं आयू तक नं थ्यंवन । अले
थुबले मनूतय चित्तय अनित्य बोध ज्वी मफयाः बिस्तारं
लोभ द्वेष मोहनं थाय कयाः कथहनं आयू घटे जुजुं ९०
हजार वर्षं तक नं थ्यंवल । थुबले सुजात बोधिसत्त्व
तुसिता भुवने च्वनाच्वना विज्याःबले आपालं देव ब्रह्मा
पिसं वसपोलयात मनूष्यलोके बुद्ध जुया विज्यायूत प्रार्थना
याःवल । देव ब्रह्मापिनिगु प्रार्थनायात विचाः यानाः
वसपोलं थःगु दृष्टिं मनूष्यलोके पञ्चमहाविलोकन (काल,
देश, द्वीप, कूल मातु आयूपरिच्छेद) स्वयाविज्यात । थुगु
समय मनूष्यलोके थुगु न्यागू तत्वत नं पुरेजुगु सीकाः
वसपोल तुसिता भुवनं कुहाँ विज्यानाः मनूष्य लोकया
सुमंगल धयागु देशे उगत धयाम्ह जुजुया अग्रमहारानी

प्रभावतीया गर्भे च्वनाः भिला पुवंसेलि बगैचाय् जन्म
जुयाबिज्याता वसपोलयात सुजात धकाः नामाकरण यात ।
छसीकथं वैश जाया वसेलि वसपोलयात मौसम अनुकूल
जीक च्वनेगु लागि स्वंगू दरबारत थुकथं नाँ तयाः
दयकाबिल ।

१) सिरी दरवार

२) उपसिरी दरवार

३) सिरीनन्द दरवार

वसपोलयात सिरीनन्दा धयाम्ह युवराज्ञी प्रमुख २३
हजार सेविकापिसं घेरे याकाः बिबाह यानाबिल । युवराज्ञी
प्रमुख आपालं सेविकापिसं सेवा याकाः स्वंगू दरबारे
वसपोल बोधिसत्त्वं यक्को वर्षतक काम सुख भोग याना
बिज्यात । सिरीनन्दा युवराज्ञीया पाखें उपसेन धयाम्ह
काय् छम्ह दयवं वसपोल बोधिसत्त्वया मने बैराग्य भाव
दनावल । छन्हु चाःह्यू बिज्याःबले प्यंगू निमित्त (बुढा-बुढी,
रोगी, सीम्ह व त्यागी) खनाः वसपोलया मन त्राही त्राही
ज्वीक गयात । अले वसपोल हंसवत्त धयाम्ह सल गयाः
गृहत्याग यानाबिज्यात । बोधिसत्त्वं गृहत्याग याना
बिज्याःगु खबर सियाः वसपोल नापं मेपिं १ करोड
मनूतय्सनं गृहत्याग यानाः वसपोलया ल्यू ल्यू वन ।
वसपोल सुजात बोधिसत्त्वं थुपिं १ करोड मनूत नापं ९

महिना तक दुस्कर चर्या यानाबिज्यात । छन्हु बैशाख पुन्ही
खुन्हु सिरीनन्दन धयाम्ह महाजनया म्थ्यायनं व्यूगु क्षीर
भोजनयात ४९ प्ये याना भपाः बिज्यानाः, सुनन्द धयाम्ह
आजिवकं व्यूगु च्याम्हू घाँय् तिंमा (महविणु बृक्ष) धयागु
बोधिबृक्षमाया क्वय् लायाः प्यंगू वीर्य न्ह्योने तयाः (लाहि
गंसां, क्वय् चूचू दंसां हिनु चब्बूसां) बोधिज्ञान प्राप्त
मजूतल्ले थुगु थासं दने मखु धकाः अधिस्थान यानाः
आसनय् फ्यतुना बिज्यात । थुकथं थःगु समाधि बल्लाकाः
द्यो निभाः मबीनिवं पञ्चमारयात त्याकाः रात्रीया प्रथम
याम, दुतीय याम व तृतीय यामे क्रमशः पुब्बेनिवास ज्ञान,
दिब्बचक्खु ज्ञान व आसवक्खय ज्ञान आदि प्राप्त याना
अन्तिमय् बोधिज्ञान प्राप्त यानाः बुद्ध जुयाबिज्यात । बुद्ध
जुया बिज्याय् धुंका बोधि बृक्षमाया आसपासे सप्त सप्ताह
४९ न्हु तक च्वनाः वसपोलं प्राप्त याना बिज्याःगु
ज्ञानयात अनुलोम प्रतिलोम याना च्वनिसें क्वथ्यंक क्वनिसें
क्वथ्यंक बिचाः याना च्वनाबिज्यात । उगु ४९ न्हु तक
वसपोलं छुंहे आहार सेवन यानाबिमज्याः । थुकथं
बोधबृक्षमाया आसपासे न्हेन्हु न्हेन्हु न्हय्थाय् सप्त सप्ताह
बिते याना बिज्यानाः बोधिज्ञानया बारे सम्पूर्ण ज्या
सिधय्काः वसपोलयात प्राप्त जूगु आहार सेवन यानाः
बोधिज्ञान सुयात कंसा थ्वीका काइगु ज्वी धकाः बुद्ध ज्ञान

स्वया बिज्याःबले संसारया अपोलं अपो मनूतय् मनय्
 ख्वातुक्क क्लेशं भुनातःगुलिं इमिसं काचाक्क थ्वीका काय्
 फैमखुगु खंकाः वसपोल निराश जुयाबिज्यात । थुबलेहे
 ब्रह्मा वयाः वसपोलयात संसारया मनूत क्लेश ख्वातुपिं
 जक मखु क्लेश सालुपिं नं दनिगु सूचना बियाः याकन हे
 जगत संसार उद्धार याय्गु लागि बुद्धं इमित धर्म देशना
 यानाबिज्याय्त प्रार्थना याःवल । ब्रह्माया प्रार्थना न्यनाः
 बुद्धं आः सुयात धर्म देशना याय्माली धकाः बुद्ध ज्ञानं
 स्वयाबिज्याःबले थः चिरिमांया काय् (किजा) सुदस्सन
 कुमार व पुरोहितया काय् सुदेव कुमारयात खंका
 बिज्यात । अले सुजात बुद्ध सुमंगल देशया सुमंगल
 बगैचाय् बिज्यानाः सुदस्सन कुमार व सुदेव कुमार प्रमुख
 यक्को मनूष्यपिं व देव ब्रह्मापिन्त धर्मचक्र प्रवर्तन
 यानाबिज्यात । थुकथं आपालं देव मनूष्यपिसं धर्म अमृत
 प्राप्त यानाकाल । सुजात बुद्धं आपालं गां गामे, नगरं
 नगरे धर्म प्रचार याना बिज्यानाः वसपोलया आपालं
 श्रावक, श्रावीकापिं दत ।

सुजात बुद्धया अग्रश्रावक भिक्षुपिं-सुदस्सन भिक्षु व सुदेव
 भिक्षु

सुजात बुद्धया अग्रश्रावीका भिक्षुणीपिं-नागा भिक्षुणी
 नागसमाला भिक्षुणी

सुजात बुद्धया नीजि सेवक भिक्षु-नारद भिक्षु
 सुजात बुद्धया मुख्यपिं उपासकपिं-सुदत्त व चित्त
 सुजात बुद्धया मुख्यपिं उपासिकापिं-सुभद्रा व पदुमा
 सुजात बुद्धया म्हधिकः -५० कु हाकः
 सुजात बुद्धया रश्मि -सारा चक्रवाले फैलेजू (सूर्य चन्द्रया
 रश्मियात तोपू)
 सुजात बुद्ध मनूतयगु आयू ९० हजार वर्ष दुबले जन्म
 जूबिज्याःगु खः ।

गौतम बुद्ध ज्वीम्ह बोधिसत्त्व

सुजात बुद्धया पाले गौतम बुद्ध ज्वीम्ह बोधिसत्त्व
 चक्रवर्ती जुजु जुयाबिज्यात । वसपोलया देशया नां
 सुमंगल खः । बुद्ध लोके उत्पन्न जूगु सियाः वसपोल
 बोधिसत्त्वं बुद्ध नापलानाः धर्मदेशना न्यनेवं श्रद्धा उत्पन्न
 जुयाः बुद्ध सहित भिक्षुसंघयात वर्षाबास ३ ला तक भोजन
 दान यात । बुद्ध शासने श्रद्धा उत्पन्न जुयाः राज्य शासने
 बैराग्य उत्पन्न जुयाः वसपोल बोधिसत्त्वं न्हेगू रत्न सहित
 चक्रवर्ती राज्ययात त्याग यानाः सारा पञ्चकाम सुखयात
 नं त्याग यानाः सुजात बुद्धयाथाय् भिक्षु जूयाबिज्यात ।
 वसपोलं थःगु देशय् कयातःगु आयस्ता नं फुक्कं भिक्षु

संघयात दान बिल । चक्रवर्ती जुजुया थपाय्चवः तसकं
तच्चःगु श्रद्धा शील नियम व तीक्ष्ण बुद्धी खनाः सुजात बुद्धं
ध्व सु ज्वीम्ह धकाः अनागतंश ज्ञानं स्वया बिज्याःबले
वसपोल बोधिसत्त्व भद्रकल्पे गौतम गोत्रय् शाक्य कूले
शाक्यमुनी बुद्ध धाय्काः प्रख्यात ज्वीतिनिम्ह धयागु सीका
बिज्यात । वसपोलं बोधिसत्त्वया न्ह्योने वसपोल भविष्ये
बुद्ध ज्वीतिनि धकाः घोषणा याना बिज्याय्वं बोधिसत्त्व
लय्तायाः ध्यान भावनायात अभ् बृद्धि यानाः ध्यान
समापत्ति लाभ यानाः परलोक जुयाः ब्रह्मालोके जन्म काः
बिज्यात ।



वर कल्प

१६. पियदस्सी बुद्ध

पियदस्सी बुद्ध नीच्याम्ह तथागतपिं मध्ये
भिंखुम्हम्ह बुद्ध खः ।

सुजात बुद्धं बोधिज्ञान लाभ यानाः आपालं जगत
संसार उद्धार यानाविज्याय् धुंकाः परिनिर्वाण जुया-
विज्यात । वसपोलया परिनिर्वाण लिपा बुद्ध शासन नं लोप
जुयाः कल्प नं नाश जुल । अनं लिपा असंख्य कल्पतक
सून्य कल्प उत्पन्न जुल । कथहनं सून्य कल्पनं नाश जुजुं
वनाः थुगु कल्पं च्वे हिसाव याय्बले दोछि व च्यासः कल्प
न्हापा बुद्ध स्वम्ह विज्याइगु वर कल्प छगू उत्पन्न जुल ।
थुगु कल्पे थुकथं छसीकथं बुद्धपिं उत्पन्न जुयाविज्यात ।

१) पियदस्सी बुद्ध

२) अट्टदस्सी बुद्ध

३) धम्मदस्सी बुद्ध

वरकल्प उत्पन्न जुयाः मनूतयगुं आयू असंख्य वर्ष
दयाच्चवंबले मनूतयसं अनित्ययात थ्वीके मफुगु कारणं
विस्तारं इमिगु चित्तय् लोभ, द्वेष व मोह उत्पन्न जुयाः

अधार्मिक ज्यात यानाहल । अधार्मिक चित्त दयावःलिसे
मनूतय् आयू सच्छिदँय दच्छि घटे जुजुं वनाः असंख्य
आयूनं ९० हजार वर्ष तक थ्यंवन । थुबले पियदस्सी बुद्ध
ज्वीम्ह बोधिसत्त्व तुसिता भूवने च्वना-च्वना बिज्याःबले
आपालं देव ब्रह्मापिसं मनूष्य लोके बुद्ध जूबिज्याय्त
प्रार्थना याःवल । देव ब्रह्मापिनिगु प्रार्थना न्यनाः वसपोल
बोधिसत्त्वं पञ्चमहाविलोकन (काल, देश, द्वीप, कूल, मातु
आयूपरिच्छेद) स्वया बिज्याःबले मनूष्य लोके थुपिं न्यागू
तत्त्वतनं पुरे जुयाच्वंगु खंकाबिज्यात । अले वसपोल
तुसिता भूवनं कुहाँ बिज्यानाः मनूष्य लोकया सुधन्य
धयागु देशे सुदत्त जुजुया अग्रमहारानी चन्दादेवीया गर्भे
च्वंबिज्यात । १० ला गर्भे च्वनाः गर्भ पूवंसेलि वसपोल
वैशाख पुन्हीखुन्हु वरुण धयागु बगैचाय् जन्म जुया-
बिज्यात । वसपोल जन्म जुसेंनिसें तसकं यइपुसे च्वनाः
बांलाःगुलिं वसपोलयात पियदस्सी धकाः नामाकरण यात ।
छ्सीकथं वसपोलया वैश जाया वसेंलि बोधिसत्त्वयात स्वंगू
मौसमयात च्वनेगु लागी स्वंगू प्रकारयागु हे दरवार थुकथं
नां तयाः दनाबिल ।

- १) सुनिमल दरवार
- २) विमल दरवार
- ३) सिरीगुहा दरवार

वसपोल बोधिसत्त्वयात विमला देवी युवराज्ञी
 प्रमुख ३३ हजार सेविकापिसं घेरेयाकाः विबाह नं याना-
 विल । सप्त रत्नं छायापियातःगु दरवारे विमला देवी
 युवराज्ञी प्रमुख ३३ हजार सेविकापिसं सेवा याकाः वसपोल
 पियदस्सी बोधिसत्त्वं ९ हजार वर्षतक लौकिक सुख भोग
 यानाविज्यात । कथहनं विमला देवी पाखें बोधिसत्त्वया
 कञ्चनवेल धयाम्ह पुत्र छम्ह नं दत । पुत्र छम्ह दय्वं मने
 वैराग्य चित्त उतपन्न जूम्ह बोधिसत्त्वया छन्हु चाःह्यू
 विज्याःबले प्यंगू निमित्त (बुढा-बुढी,रोगी, सीम्ह व त्यागी)
 खनेवं थःनं बुढा जुयावंगु , रोगी जूगु ,व सीम्ह थें
 चाय्काः त्राही त्राही ज्वीक ग्यानाः उलिमछि लौकिक
 सुखत ह्येकथं यागु फुसुलुगु धकाः चाय्काः संसारखनाः
 विरक्त जुयाः सलं साय्कूगु रत्नयागु रथे च्वनाः गृहत्याग
 यानाविज्यात । पियदस्सी राजकुमारं गृहत्याग
 यानाविज्याःगु सियाः वसपोलनापं मेपिं १ करोड मनूतनं
 गृहत्याग यानाः पिहांवन । पियदस्सी बोधिसत्त्वं थुपिं मनूत
 नाप खुला तक दुष्कर चर्या यायां छन्हु वैशाख पुन्हीया
 दिनय् वरुण धयाम्ह द्वारेया वसमा धयाम्ह म्हायानं ब्यूगु
 क्षीर भोजन यात ४९ पे यानाः भपिया विज्यात ।
 उखुन्हुया हे दिनय् सुजात धयाम्ह आजिवकं ब्यूगु च्याम्ह
 घाँय् कयाः थाउँ च्याउँपें सिमा (पियङ्ग बृक्ष) धयागु

बोधिवृक्षमाया क्वय् लायाः प्यंगू वीर्ययात न्ह्योने तथाः
 (लाहि गंसां , क्वय् हे चूं चूं दसां, हिनूहे चब्बूसां)
 बोधिज्ञान प्राप्त मज्जीकं थ्व थासं दनेहे मखु धकाः
 अधिस्थान यानाः प्यतुनाबिज्यात । द्यो निभाः मवीवं
 पञ्चमारयात दमन यानाः रात्रीया प्रथम याम, द्वितीय
 याम व तृतीय यामे क्रमशः पुब्बेनिवास ज्ञान, दिब्बचक्खु
 ज्ञान व आसवक्खय ज्ञान प्राप्त यायां अन्तिमय् बोधिज्ञान
 प्राप्त यानाः बुद्ध जुयाबिज्यात । बोधिज्ञान प्राप्त याना
 विज्याय् धुंकाः वसपोल बोधि वृक्षमाया आसपासे ४९ न्हु
 सप्तसप्ताह तक च्वनाः थःम्हं प्राप्त यानागु ज्ञानया बारे
 च्वं निसें क्वथ्यंक् क्वं निसें च्वथ्यंक् विचाः यानाबिज्यात ।
 थुकथं न्हेन्हु न्हेन्हु न्हय्थाय् तक च्वनाः बोधिज्ञानया बारे
 चच्छि न्हिच्छि विचाः याना विज्याःबले वसपोलया ४९ न्हु
 तक हे आहार सेवन याना विज्याय् म्वाः । बोधिज्ञान प्राप्त
 ज्वी न्ह्यो भपिया विज्याःगु क्षीर भोजनया सुद्धता व
 बोधिज्ञान प्राप्त जुयाः सम्पूर्ण ज्या सिधःगु प्रीतिया कारणं
 वसपोल बुद्धया छुंहे आहार सेवन याय् म्वाय्क नय्पित्याः
 मजूगु खः । जव ४९ न्हु नं फुत, वसपोलया बोधिज्ञान
 वारे विचाः याय्माःगु ज्या फुक्कं सिधःगुलिं नय् पित्याःथें
 च्वनावल । अले वसपोलयात प्राप्त जूगु आहार सेवन
 यानाः थःम्हं प्राप्त यानागु ज्ञान सुयात कने योग्य ज्वी

धकाः बुद्ध ज्ञानं स्वया बिज्याःवले थुगु संसारे अपोलं अपो
 मनूतय् मनय् क्लेशया खिती बबः थाका च्वंपिं जक खनाः
 थुमिसं ज्ञान थ्वीकीगु खैला धयाथें ताय्काः वसपोल
 निराश जुयाबिज्यात । थुगु इलय् हे ब्रह्मा वयाः निराश
 जुयाबिज्याःम्ह बुद्धयात थ्व संसारे क्लेश ख्वातुपिं जक मखु
 क्लेश सालुपिं मनूतनं दु , इमितसां धर्म देशना यानाः
 याकनं जगत संसार उद्धार याय् हथाय् जूगु सुचना बियाः
 धर्मदेशना याना बिज्याय्त प्रार्थना याःवल । ब्रह्माया
 प्रार्थना स्वीकार याना बिज्यासे बुद्धं सुयात धर्मदेशना
 याय्माली धकाः थःगु बुद्ध ज्ञानं स्वया बिज्याःवले
 वसपोलनाप गृहत्याग याना वःपिं १ करोडं मयाक
 मनूतय्त खंका- बिज्यात । अले वसपोल बुद्ध थुपिं मनूत
 च्वनाच्चंगु उसभवती धयागु देशया लिक्क उसभवन
 धयागु बगैचाय् बिज्यानाः इपिं १ करोड मनूत प्रमुख
 आपालं मनूष्य व देव ब्रह्मापिन्त धर्मचक्र प्रवर्तन
 यानाबिज्यात । आपालं देव मनूष्यपिसं थुगु धर्म देशना
 न्यनाः अमृत ज्ञान लाभ यानाकाल । थुकथं पियदस्सी बुद्धं
 गामं गामे नगरं नगरे धर्म देशना यायां वसपोलया
 आपालं श्रावक श्राविकापिं दत ।
 पियदस्सी बुद्धया अग्र श्रावक भिक्षुपिं-पालित भिक्षु व सब्ब
 दस्सी भिक्षु

पियदस्सी बुद्धया अग्र श्राविक भिक्षुणीपिं-सुजाता भिक्षुणी
व धम्मदिन्ना भिक्षुणी

पियदस्सी बुद्धया निजि सेवक भिक्षु-शोभित भिक्षु

पियदस्सी बुद्धया मुख्यपिं उपासकपिं-सन्धक व धम्मक

पियदस्सी बुद्धया मुख्यपिं उपासिकापिं-बिशाखा व
धम्मदिन्ना

पियदस्सी बुद्धया म्हधिकः -८० कु हाकः

वसपोल पियदस्सी बुद्ध मनूतय् आयू ९० हजार
वर्ष दुबले जन्म जुयाबिज्याःगु खः ।

गौतम बुद्ध ज्वीम्ह बोधिसत्व

पियदस्सी बुद्धया पाले गौतम बुद्ध ज्वीम्ह
बोधिसत्व कस्सप धयाम्ह ब्राह्मण जुयाच्चन । थुगु जन्मे
कस्सप बोधिसत्व इतिहास ग्रन्थ सहित स्वंगू वेदं
पारंगतम्ह जुयाच्चन । वसपोलं आपालं चेलात लहिनाः
शील्प बिद्या स्यना च्वंम्ह जुयाच्चन । पियदस्सी बुद्ध लोके
उत्पन्न जूगु व वसपोल सुधन्यवती देशे विज्याइगु खवर
बोधिसत्वं सियाः बुद्धया दर्शन याःवनेत थःचेलापिं नं
यंकाविज्यात । यक्को बिद्या शास्त्रं पारंगतम्ह बोधिसत्वं
पियदस्सी बुद्ध ३२ महापुरुष लक्षण व ८० गू व्यञ्जनं
पूर्णम्ह खंकाः वसपोलप्रति तसकं श्रद्धा भयविल । उलि

जक मखु पारमी संभार दय् धुंकूम्ह कस्सप बोधिसत्त्व
 पियदस्सी बुद्धया उपदेश न्यनाः श्रद्धा उत्पन्न जुयाः बुद्ध
 खनाः तसकं प्रभावित जुयाबिज्यात । वसपोलं १ लाख
 करोड धन खर्च यानाः तसकं न्ह्यइपुसे च्वंगु बाँलाःगु
 बिहार दय्काः बुद्धयात दान बिल ।

थुकथं उगु जन्मे कस्सप बोधिसत्त्व शील आचरणं
 परिपूर्ण ज्वीकाः दान, शील, भावनायात पुरे यानाच्चन ।
 पियदस्सी बुद्धं थुम्ह बोधिसत्त्वया शील आचरण खनाः
 प्रभावित जुयाः थ्व सु ज्वी धकाः अनागतंश ज्ञानं स्वया
 बिज्याःबले भद्रकल्पे गौतम गोत्रय् शाक्य कूलय् शाक्यमुनी
 बुद्ध धाय्काः प्रख्यातम्ह बुद्ध ज्वीगु खंकाबिज्यात । अले
 पियदस्सी बुद्धं कस्सप बोधिसत्त्वया न्ह्योने वसपोल
 भद्रकल्पे शाक्यमुनी बुद्ध ज्वीतिनिम्ह धकाः भविष्य वाणी
 यानाबिज्यात । बुद्धया पाखें थुगु भविष्य वाणी न्यनाः
 कस्सप बोधिसत्त्व तसकं लय्तायाः थःगु शील समाधी
 प्रज्ञायात भन भन बृद्धी यायां सुगती जन्म काःबिज्यात ।



वर कल्प १७. अट्ट दस्सी बुद्ध

अट्टदस्सी बुद्ध नीच्याम्ह तथागतपिं मध्ये
भिन्हेम्हम्ह खः ।

पियदस्सी बुद्ध परिनिर्वाण जुया बिज्याय् धुंकाः
मनूष्यलोके धर्म नं लोप जुजुं वनाः अधर्म बढे जूगु कारणं
मनूतयग्गु आयू सच्छिदँय् दच्छि घटेजुया ववं ९० हजार
वर्ष आयूनं १० वर्ष आयू तक थ्यंवन । १० वर्ष आयू
थ्यंबले अपो मनूत अधार्मिक ज्वीगु जूगुलिं बल्लाम्हस्यां
बमलाःम्हसित स्यानाः पालाः नइगु जूवन । थज्याःपिं
पापीपिनि पुचले च्वने ग्याःपिं मनूत जंगले सुला च्वंवन ।
इमिसं जंगले च्वंगु सिमाहः व फलफूल जक नयाः दिन
बिते यानाः पापकर्म याय्गुलिं बचे जुयाच्च्वन । थथे
पापकर्म बचेजूपिं १० दँ दुपिं मनूतसें २० दँ म्वाइम्ह मचा
व्वीकल । नीदँ दुम्ह मनूखं ४० दँ म्वाईम्ह मचा व्वीकल ।
थुकथं मनूतयग्गु आयू दोब्बर बढे जुजुं असंख्य वर्षे
थ्यंवन । असंख्य वर्ष आयू दुपिनि सीमाःगु धयागु ज्ञान
तापाना वनाः कथहनं अहंकार दयावल । लोभ द्वेष मोह थें
ज्याःगु क्लेशत बढे जुजुं मनूतयग्गु आयू हानं सच्छिदँय्

दच्छि घटे जुजुं १ लाख वर्ष तक थ्यन । थुगु अवस्थाय् अट्टदस्सी बोधिसत्त्वं पारमिता पुरेयाय् सिधय्काः तुसिता भूवने च्वना च्वना विज्यात । आपालं देवब्रह्मापिं वया वसपोल बोधिसत्त्वयात मनूष्यलोके बुद्ध जुया विज्यायूत प्रार्थना याःवल । अट्टदस्सी बोधिसत्त्वं नं पञ्च महाविलोकन (काल, देश, द्वीप, कूल, मातु आयू परिच्छेद) स्वयाविज्यात । मनूष्य लोके थुगु न्यागू तत्त्वत नं पुरे जूगु खंका विज्यानाः अट्टदस्सी बोधिसत्त्व तुसिता भूवनं कुहाँ विज्यानाः मनूष्य लोकया शोभित देशया सागर जुजुया अग्रमहारानी सुदर्शनाया गर्भे च्वं विज्यात । गर्भे च्वनां फ़िला पूवसेलि वसपोल सुचिन्धन धयागु बगैचाय् बैशाख पुन्ही खुन्हु जन्म जुयाविज्यात । उगु बगैचाय् न्हापा गाडे यानातःगु धन माले मफयाः तनाच्चंगु जुयाच्चन । अट्टदस्सी बोधिसत्त्व जन्म ज्वीसाथ उगु तनाच्चंगु धन लुयावःगुलिं वसपोल बोधिसत्त्वयात अट्टदस्सी धकाः नामाकरण यानाविल । अट्टदस्सी बोधिसत्त्व तःधिकः मजूतल्ले सप्त रत्नयागु हुसुलुंचाय् तयाः तःधी याःगु जुयाच्चन । कथहनं बैश जाया वसेलि वसपोलयात स्वंगू ऋतुयात च्वने जीक स्वंगू दरवारत दय्का विल । उगु दरवारया नां थुकथं खः ।

१) अमरागिरी दरवार

२) सूरगिरी दरवार

३) गिरीवाहन दरवार

वसपोल बोधिसत्त्वयात विशाखादेवी युवराज्ञी प्रमुख ३३ हजार सेविकापिसं चाःह्वीकाः बिबाह याना-बिल । विशाखादेवी प्रमुख ३३ हजार सेवीकापिसं सेवा याकाः अट्टदस्सी बोधिसत्त्वं उगु स्वंगू दरवारे १० हजार वर्ष तक लौकिक सुख भोग यानाबिज्यात । कथहनं विशाखादेवी युवराज्ञीया पाखें काय् छम्ह दत । उम्ह राजकुमारयात सेल कुमार धकाः नामाकरण यात । काय् छम्ह दसेलि बोधिसत्त्वया मने भचा बैराग्य भाव दनावल । छन्हु चाःह्यु बिज्याःबले वसपोलं प्यंगू निमित्त (बुढा-बुढी, रोगी, सीम्ह व त्यागी) खनाः तसकं गयाका बिज्यात । उगु प्यंगू निमित्त उगुहे अवस्थाय् वसपोलं हे भोग यानाच्चंथे च्वंक अनुभव यानाः त्राही त्राही जुयाः सुदस्सना धयाम्ह मंगल सल गयाः गृहत्यात यानाबिज्यात । अट्टदस्सी बोधिसत्त्वं गृहत्यात याना बिज्याःगु सियाः ९ करोड मनूतसें नं बैराग्य चित्त वय्काः थःथःगु छ्येँ, बुँ, धन सम्पत्ति आदि त्याग यानाः बोधिसत्त्व नापलिनाः पिहांवन । अट्टदस्सी बोधिसत्त्वं वसपोल नापं पिहांवःपिं मनूत नाप न महिना तक दुष्कर चर्या यानाबिज्यात । छन्हु विशाख नक्षत्रं युक्तगु वैशाख पुन्ही खुन्हु वसपोलयात सुचिन्धरा

धयाम्ह नागकन्यां दान व्यूगु क्षीर भोजनयात वसपोलं ४९.
 प्ये यानाः भपिया विज्यानाः धम्मरुची धयाम्ह नागराजां
 दान व्यूगु कूश घाँय् च्याम्हू कयाः भक्काः पाँ मा (चम्पक
 वृक्ष) धयागु वोधिवृक्षः सिमाक्वे लाया विज्यात । घाँय्
 लाय् धुंकाः उत्पन्न जूगु ५३ कु हाकःगु आशनय् वसपोलं
 प्यंगू वीर्य यात आरम्मण यानाः फ्यतुना विज्यानाः
 वोधिज्ञान प्राप्त मजूतल्ले थुगु आशनं दनेमखु धकाः
 अधिस्थान यानाविज्यात । द्यो मवीनिवं पञ्चमारयात
 त्याकाः रात्रीया प्रथम याम, द्वितिय याम, व तृतीय यामे
 क्रमशः पुव्वेनिवास ज्ञान, दिव्व चक्खु ज्ञान व आसवक्खय
 ज्ञानयात प्राप्त यानाः अन्तिमय् वोधिज्ञान प्राप्त यानाः
 सर्वज्ञ बुद्ध जुयाविज्यात ।

बुद्ध जुयाविज्याय् धुंकाः वसपोल अट्टदस्सी बुद्ध
 वोधिवृक्ष सिमाया जःखः ४९ दिन अर्थात् सप्त सप्ताह
 तक वोधिज्ञानया वारे च्वनिसें क्वयथ्यंक् क्वनिसें च्वथ्यंक्
 सम्पूर्ण ज्ञानयात विचा याना च्वनाविज्यात । बिनाःआहार
 पीगुन्हु तक धुकथं सम्पूर्ण वोधिज्ञानयात विचाःयाना
 विज्याय् धुंकाः तिनि वसपोलया नय्पित्याः थें जुयावल ।
 अले खुसी ख्वा सिला विज्यानाः दातवन याना विज्याय्
 धुंकाः उपासक छम्हस्यां दान व्यूगु भोजन भपा विज्यात ।
 अले वसपोलं प्राप्त याना विज्याःगु ज्ञान मेपिन्त कनेत

बुद्ध ज्ञानं स्वयाविज्याःवले मनूतयुगु क्लेशं जाःगु नुगः
खना निराश जुयाच्चना विज्याःवले ब्रह्मा वयाः संसारय
क्लेश सालुपिं मनूतयुत जूसां धर्म देशना यानाः जगत
संसार उद्धार यानाविज्याहूँ धकाः प्रार्थना याःवल ।

अले वसपोल बुद्धं क्लेश सालुपिं मनूत सुदु धकाः
बुद्ध ज्ञानं स्वया विज्यायुवं थः नापं प्रब्रजित जुयावःपिं
पासापिन्त खंकाः अनोमा देशया अनोमा वगैचाय् कुहाँ
विज्याना थुपिं पासापिन्त धर्मचक्र प्रवर्तन यानाविज्यात ।
थुगु धर्मदेशना न्यनाः आपालं मनूत व देव ब्रह्मापिसं
अमृत ज्ञानयात प्राप्त यायुत सफल जुल ।

अनंलि अट्टदस्सी बुद्धं थः शिष्यपिन्त नं गामं गामे
नगरं नगरे धर्म प्रचार याके छ्वत । अथेहे वसपोल नं धर्म
प्रचारया लागि थासं थासे विज्यात । थथे जुजुं वसपोल
बुद्धया आपालं श्रावक, श्राविका, व उपासक उपासिकापिं
दत । इपिं श्रावक, श्राविका व उपासक उपासिकापिं मध्ये
अग्रपिं थुकथं खः ।

अट्टदस्सी बुद्धया अग्रश्रावक भिक्षुपिं- शन्त भिक्षु व
उपशन्त भिक्षु

अट्टदस्सी बुद्धया अग्रश्राविका भिक्षुणीपिं- धम्मा थेरी (भि-
क्षुणी), सुधम्मा थेरी (भिक्षुणी)

अट्टदस्सी बुद्धया निजी सेवक भिक्षु- अभय भिक्षु

अट्टदस्सी बुद्धया मुख्यिपिं उपासकपिं- नकुल व निसभ
अट्टदस्सी बुद्धया मुख्यिपिं उपासिकापिं- मनिला व सुनन्दा
अट्टदस्सी बुद्धया म्ह धिकः - ८० कु हाकः

अट्टदस्सी बुद्धया रश्मि - छगू योजनतक फैले जू ।

वसपोल अट्टदस्सी बुद्ध मनूतय्गु आयू १ लाख वर्ष
दुबले जन्म जू बिज्याःगु खः ।

गौतम बुद्ध ज्वीम्ह बोधिसत्त्व

अट्टदस्सी बुद्धया पाले गौतम बुद्ध ज्वीम्ह बोधिसत्त्व
सुसीम तपस्वी जुयाच्वन । अट्टदस्सी बुद्ध लोके उत्पन्न
मज्जिबले थुम्ह बोधिसत्त्व चम्पक देशया महाशाल
ब्राह्मणया कूले जन्म जुयाः सुसीम धयागु नामं प्रख्यात
जुयाच्वन । वसपोलययात पारमी धर्म घ्वानाहःगुलिं सुसिम
बोधिसत्त्वं थःगु सम्पूर्ण सम्पत्तियात त्याग यानाः हिमालये
वनाः ऋषी भेषे थःगु वीर्य बलं मेहनत यायां ध्यान याःगु
अवस्थाय् ८ गू समापत्ति व ५ गू अभिज्ञा ज्ञानं पूर्ण जुल ।
थुकथं सुसीम ऋषीं थःगु ऋध्दी बलं दुर्गती वनेगु
पापकर्मत हटेयायां सुगती वनेगु कुशल कर्मया वारे
उपदेश व्युव्युं चाःहिला च्वनाविज्यात । छन्हु वसपोलययात
लोके अट्टदस्सी बुद्ध उत्पन्न जूगु समाचार प्राप्त जुल ।
छन्हु चम्पक देशे बुद्धयात निमन्त्रणा याना तःगुलिं

वसपोल बोधिसत्त्व निमन्त्रणा यानातःगु थासे विज्यानाः
बुद्धया दर्शन याःविज्यात । अबले बुद्धया उपदेश न्यनाः
बोधिसत्त्व तसकं प्रभावित जुयाः बुद्ध प्रति यक्को श्रद्धा
प्रकट यात । अले थःगु ऋद्धी शक्तिं देवलोके वनाः
देवलोकया पलेस्वाँ व इन्द्रयाथाय् जक दइगु स्वाँ हयाः
बुद्धयात बाँलाक पूजा यात । ऋद्धी बलं उत्तर कुरुद्वीप
थ्यंक विज्यानाः भिक्षा कयाहयाः ७ न्हु तक दान प्रदान
यानाविज्यात ।

थुगु जन्मे सुसीम बोधिसत्त्वं खुगू प्रज्ञां नं पूर्ण
जुल । इपिं थुकथं खः ।

- १) तिक्ख प्रज्ञा - सुनाहे सीके मफुगु गम्भीरगु खँत
सीकेफुगु ज्ञान ।
- २) हाँस प्रज्ञा - करपिनि मन प्रशन्न ज्वीक मन याउँक खँ
ल्हाय् सःगु ज्ञान ।
- ३) जवन प्रज्ञा - खने मात्रं, ताय् मात्रं तुरुन्त उकीया मूल
कारण नापं सीके फुगु प्रज्ञा ।
- ४) दल्ल प्रज्ञा - छकः न्यने धुनेवं गुबलें हे लोमनी मखुगु
प्रज्ञा ।
- ५) भूरी प्रज्ञा - महापृथ्वी थें तसकं शक्ति दुगु प्रज्ञा ।
- ६) गम्भीर प्रज्ञा - तसकं सीकां सीके थाकुगु गम्भीरगु
ज्ञानयात नं सीके फुगु प्रज्ञा ।

अद्दस्सी बुद्धं सुसीम बोधिसत्त्वयाके थुपिं आपालं
 गुणत दुगु खनाः थ्व सु ज्वी, लिपा छु ज्वीम्ह ज्वी धकाः
 थःगु अनागतंश ज्ञानं स्वया विज्याःगु बखते थुम्ह
 बोधिसत्त्व भद्रकल्पे गोतम गोत्रे, शाक्य कूले शाक्यमुनी
 बुद्ध धाय्काः प्रख्यातम्ह बुद्ध ज्वीम्ह धकाः सीकाः सुसीम
 बोधिसत्त्वया न्योने थुगु खँया भविष्य बाणी याना-
 विज्यात । थुगु भविष्य बाणी न्यने धुनेवं सुसीम
 बोधिसत्त्वया उत्साह भन बढे जुल । त्रयपोलं न्हापा
 यानावःगु गुलिन कुशलकर्मत दु , इपिं फुक्क पारमि धर्मय
 संग्रह जूवनीगु धयागु सियाः अभ् उत्साहि जुयाः, मेहनती
 पूर्वक दश पारमिता पूरा यायां उगु देहयात तोताः
 ब्रह्मलोके जन्म काः विज्यात ।

Dhamma.Digital



वर कल्प

१८. धम्मदस्सी बुद्ध

धम्मदस्सी बुद्ध नीच्याम्ह तथागतपिं मध्ये
भिंच्याम्हम्ह बुद्ध खः । वसपोल वरकल्पया दकले
लीपायाम्ह बुद्ध खः ।

अट्टदस्सी बुद्धं आपालं जगत संसार उद्धार यानाः
परिनिर्वाण जुयाविज्याय् धुंकाः लोकय् बुद्ध शासन लोप
जुल । धर्मचेतना लोप जुजुं अधार्मिक कार्यत बढे जुजुं १
लाख वर्षया आयू कथहनं घटेजुयाः १० वर्षया उमेरय्
थ्यकःवल । थुगु समयलय् मनुतय् नय्मखनाः अपोलं अपो
वल्लाःपिं पापीतेसं वमलाःम्हेसित स्यानाः नइगु जुल । थुगु
कार्ययात मयोपिं धर्म चेतना दुपिं गुम्हं मनूत जंगलेवनाः
सुलाच्चन । इमिसं सिमाहः व फलफुल नयाः जीविका
यायां धर्मचेतना उत्पन्न यानाज्वी । उकें थुपिं भिदं दुपिं
मनूतय् पाखें नीदं म्वाइम्ह मचा दत, नीदं दुम्हस्यां पीदं
म्वाइम्ह मचा बुइकल । थुकथं गुलि गुलि चित्त स्वच्छ
निर्मल जुल, उलि उलि मनूतय् आयू दोब्बरया रूपे बढे
जुजुं असंख्य आयू तकनं थ्यन । असंख्य आयू थ्यंबले

मनूतय् चित्तय् अनित्य बोढ कम जुजुं वनाः विस्तारं
अहंकार दनावःगु कारणं लोभ द्वेष मोहया उदय जुजुं आयू
सच्छिदय्य दच्छि घटे जुजुं वनाः असंख्य आयुनं १ लाख
वर्षतक थ्यंकवल । थुबले धम्मदस्सी बोधिसत्त्व पारमीता
पुरेज्जी धुंकाः तुसिता भूवने च्वनाच्वना विज्याःगु जुया-
च्वन । ३३ कोटी देव ब्रह्मापिं वयाः वसपोल
बोधिसत्त्वयात मनूष्यलोके बुद्ध जुयाः जगत संसार उद्धार
याना विज्यायेगु समय जूगु सुचना वियाः प्रार्थना याःवल ।
इमिगु प्रार्थना न्यनाः धम्मदस्सी बुद्धं पञ्चमहाविलोकन (
काल, देश, द्वीप, कूल, मातु आयू परिच्छेद) यात विचाः
यानाः स्वयाविज्यानाः थुगु न्यागू तत्त्वत नं पूरा जुयाच्वंगु
सीकाः वसपोल तुसिता भूवनं कुहां विज्यानाः
मनूष्यलोकया शरण धयागु देशे शरण धयाम्ह जुजुया
अग्रमहारानी सुनन्दा देवीया गर्भे च्वंविज्यात । गर्भे च्वनाः
भिला पूवंगु अवस्थाय वैशाख पुन्ही खुन्हु वसपोल छगू
वगैचाय् जन्म जुयाविज्यात । धम्म दस्सी बोधिसत्त्व जन्म
जुयाः विज्यायसाथं देशया संविधानय् अध्यामक नियमत
धाक्को लोप जुयावन । प्रजापिन्त सुख ज्वीगु न्यायपूर्णगु
धार्मिक नियम कानूनत जक ल्यनाच्वन । थुगु
आश्चर्यपूर्णगु भिंगु घटना जूगुलिं वसपोलयात धम्मदस्सी
धकाः नामाकरण यात ।

कथहनं धम्मदस्सी बोधिसत्त्वया बैश जायावसेलि
वसपोलयात स्वंगू मौसम अनुसार च्वनेत स्वंगू दरवारत
थुकथं विभिन्न नां तयाः दनाविल ।

- १) अरजा दरवार
- २) विरजा दरवार
- ३) सुदर्शना दरवार

धम्म दस्सी बोधिसत्त्वयात विचितोली युवराज्ञी
प्रमुख मेपीं २० हजार सेवीकापिसं घेरेयाकाः बिबाह
यानाबिल । युवराज्ञी प्रमुख २० हजार केटीपिं नाप
धम्मदस्सी तथागतं स्वंगू दरबारे ८ हजार वर्षतक लौकिक
सुख भोग यानाबिज्यात । छन्हु विचितोली युवराज्ञीया
पाखें पुण्यवधन धयाम्ह काय् छम्ह प्राप्त जुल । काय् छम्ह
दुसानिसें धम्मदस्सी बोधिसत्त्वया मने बैराग्य भाव दना-
वल । वगैचाय् छकः चाह्यू बिज्याःबले प्यंगू निमित्त
(बुढा-बुढी, रोगी, सीम्ह मनु व त्यागी) खंसां निसें
वसपोलया मनय् तसकं भय दनावल । सम्पूर्ण काम सुख
ह्येकथंयागु फुसुलुगु धकाः थ्वीका बिज्यानाः संसार भय
खनाः ग्यानाः वसपोलया न्ह्योः हे मवल । न्ह्योः मवयाः
दनाः स्वःबले थः युवराज्ञी व मेपिं केटीपिं अस्त ब्यस्तगु
अवस्थाय् न्ह्योः वय्का च्वंगु खनाः इमिगु पुचले थःत
खनाः तसकं घृणा चाय्काः गज्याःथाय् वयाच्चनागु थ्व
धकाः ग्यात ।

थथे भन भनहे विरक्तभावं यानाः वसपोल
 बोधिसत्त्व छन्हु सुदर्शना दरवारे च्वनाच्चंबले उगु
 दरवारयात नापं आकाश मार्गं व्वय्काः यंकाः नक्तकुरवक
 धयागु सिमाया क्वय् दरवार दिका विज्यात । अन
 वसपोलयात ब्रह्मां चीवर दान बीहल । उक्त चीवर
 बोधिसत्त्व पुनाः प्रब्रज्या जुयाविज्यात । अनं लिपा दरवारे
 बाकि दनिपिं १ लाख करोड मनूत फुक्कं भिक्षु जुयाः इपिं
 नापंतुं बोधिसत्त्व ७ न्हु तक दुष्कर चर्या यानाविज्यात ।
 छन्हु बैशाख पुन्ही खुन्हु विचितोली युवराज्ञीं दानव्यूगु क्षीर
 भोजन ४९ •प्ये यानाः भपाः विज्यात । अनलिपा
 सिरीवड्ढन धयाम्ह वुंथुवालं दानव्यूगु च्याम्हू घांय्
 येघटेमा (नक्तकुरवक वृक्ष) बोधिबृक्षया क्वे लाया विज्याता।
 घांय् लाया विज्याय्वं अनं उत्पन्न जूगु ५३ कु हाकःगु
 आशनय् ४ गू वीर्ययात न्ह्योने तयाः बोधिज्ञान प्राप्त
 मज्जीकं थुगु आशनं दनेहे मखु धकाः अधिस्थान यानाः
 फ्यतुनाः ध्यान यानाविज्यात । द्यो निभाःमवीनिवं
 पञ्चमारयात दमन यानाविज्यात । अनं छसीकथं रात्रीया
 प्रथम यामे पुव्वेनिवास ज्ञान, द्वितीययामे दिव्वचक्खु ज्ञान
 व तृतीय यामे आसवक्खय ज्ञान प्राप्त याना रात्रीया
 अन्तिम प्रहरे बोधिज्ञान प्राप्त याना सर्वज्ञ बुद्ध
 जुयाविज्यात । बोधिज्ञान प्राप्त याना विज्याय् धुंकाः

वसपोल धम्मदस्सी बुद्ध बोधीवृक्षमाया आसपासय् ४९
 न्हुतक (न्हेन्हु न्हेन्हु न्हय्थाय्) च्वना: बोधीज्ञानया वारे
 अनुलोम प्रतिलोम याना: विचा: यानाविज्यात । क्षीर
 भोजनया शुद्धता व बोधीज्ञान लाभ जूगुया प्रीतिं याना
 वसपोलया पीगुन्हुतक छुं हे आहार सेवन याना
 विज्याय्म्वा:ल । सम्पूर्ण ज्ञान मालेगु ज्या सिधसेलि ४९
 न्हु फ्वीवं क्षीर भोजनया पाखें प्राप्त जूगु आहार शक्ति नं
 फुनावंवेले वसपोलया नय् पित्याना वल । अले खुसी ख्वा:
 सिला दतिवन याना- विज्याय् धुंका: प्राप्त जूगु आहार
 सेवन यानाविज्यात । सम्पूर्ण ज्या सिध:गुलिं वसपोलं थम्हं
 प्राप्त यानागु ज्ञान सुयात कनेमाली धका: विचा:याना:
 स्वया विज्या:वले मनूतय्गु चित्तय् तसकं क्लेशं भुनाच्चंगु
 खंका: निराश जुयाविज्यात । उथाय् लाक्क ब्रह्मा वया:
 वसपोलयात बोधीज्ञान प्रचार याना: याकनं जगत संसार
 उद्धार याना विज्याय्त् प्रार्थना या:व:वले वसपोलं हानं
 छक: थ:गु बुद्ध ज्ञानं स्वयाविज्यात। अले बुद्धं वसपोल नापं
 गृहत्याग या:पिं दरवारया परिवारपिं खंका विज्यात अले
 वसपोल मृगदाबनय् विज्याना: इपिं फुक्कसितं धर्मचक्र
 प्रवर्तन यानाविज्यात । वसपोलया धर्मदेशना न्यना:
 आपालं ब्रह्मा देव मनूष्यपिं अर्हन्त जुल । थुकथं धम्मदस्सी
 बुद्ध व वसपोलया शिष्यपिसं संसारया गामं गामे, नगरं

नगरे धर्म प्रचार यायां वसपोलया आपालं श्रावक,
श्राविका, उपासक उपासिकापिं दत ।

धम्मदस्सी बुद्धया अग्र श्रावक भिक्षुपिं - पदुम भिक्षु व
फुस्सदेव भिक्षु

धम्मदस्सी बुद्धया अग्र श्राविक भिक्षुणीपिं - खेमा थेरी
(भिक्षुणी) व सच्चवनामा थेरी (भिक्षुणी)

धम्मदस्सी बुद्धया नीजि सेवक भिक्षु - सून्यत्त भिक्षु

धम्मदस्सी बुद्धया मुख्यपिं उपासकपिं - सुभद्द व
कतिस्सह

धम्मदस्सी बुद्धया मुख्यपिं उपासिकापिं - सालिया व
कलिया

धम्मदस्सी बुद्धया म्ह धिकः - ८० कुहाकः

धम्मदस्सी बोधिसत्त्व मनूतय्गु आयू १ लाख वर्ष
दुवले जन्म जू विज्याःम्ह खः ।

गौतम बुद्ध ज्वीम्ह बोधिसत्त्व

धम्मदस्सी बुद्धया पाले गौतम बुद्ध ज्वीम्ह
बोधिसत्त्व इन्द्र देव जुयाच्चन । धम्मदस्सी तथागतं देशं
देशे गामं गामे धर्मप्रचार याना विज्याःगु वारे तथागतया
यशकीर्ति व गुणया वारे देव ब्रह्मलोक थ्यंकं फैलेजुगु खँ
बोधिसत्त्व इन्द्रं सियाः आपालं देवतापिन्त स्वां, धुं धुपाँय्

आदि व बाजागाजा थाकाः बुद्ध दर्शन यायूत मनूष्य लोके
 विज्यात । पिने च्वनाः बाजा गाजा थानाः धम्मदस्सी
 बुद्धयात भारिं पुजा यानाच्चंगु बुद्धं सिल । अले वसपोल
 बुद्धं थ्व सु ज्वीम्ह धकाः अनागतंश ज्ञानं स्वया विज्याःगु
 बखते भद्रकल्पे गौतम गोत्रय् शाक्य कुलय् शाक्यमुनि
 तथागत धायकाः प्रख्यातम्ह बुद्ध ज्वीतिनिम्ह बोधिसत्त्व
 धकाः सीका विज्यात । अले बुद्धं इन्द्र बोधिसत्त्वया न्ह्योने
 हे वसपोल भद्रकल्पे बुद्ध ज्वीतिनिम्ह धकाः भविष्य बाणी
 यानाविज्यात । बोधिसत्त्व थःगु वारे बुद्ध पाखें बांलाःगु
 भविष्य बाणी न्यनाः तसकं लय्लय् तायाः थःगु पारमी
 धर्म पुरेयाय्गुली दत्तचित्त जुजुं बोधिचित्तयात क्वातुकाः
 थःगु इन्द्रलोके तुं लिहांवन ।

Dhamma.Digital



सारकल्प

१९. सिध्दत्थ बुद्ध

सिध्दत्थ बुद्ध निच्याम्ह तथागतपिनि भवलय् भिङ्गुम्हम्ह बुद्ध खः । वसपोल सारकल्पय् उत्पन्न जुयाबिज्याःम्ह बुद्ध खः । साकल्पय् उत्पन्न जूम्ह बुद्ध जूगुलिं थुगु कल्पय् वसपोल छम्ह हे जक लोके उत्पन्न जुयाबिज्यात ।

धम्मदस्सी तथागतं लोकयात आपालं हीतोपकार यानाः परिनिर्वाण जुया बिज्यासेलि बुद्ध शासन लोप जुयाः मनूतय् चित्तय् अधार्मिक प्रवृत्तित बृद्धि जुजुं वल । अथे जुजुं मनूतयगु आयू सच्छि दँय दच्छि घटे जुजुं १ लाख वर्ष आयू नं १० दँ तक जक थ्यन । वसपोलया पालेयागु व सारकल्प नं कथहनं नाश जुयावन । अनं लिपा भिङ्हेसःगु कल्प तकला सून्य कल्प जक वयाच्चन । सून्यकल्पत नं विस्तारं नास जुयावँव सार कल्प उत्पन्न जुल । सारकल्प सुरु जूबले मनूतयगु आयू असंख्य वर्षय् थ्यन । असंख्य वर्षतक म्वाय्दुपिं मनूतसें थः छन्हु सिनावने मानि धयागु विषययात थ्वीके मफयाः विस्तारं

मनूतयगु चित्तय् क्लेशं थाय्कया हल । मनूतयगु चित्तय्
 राग द्वेष मोह रुपी क्लेस थाःबले इमिगु आयू सच्छिदय्
 दच्छिया हिसाबं घटे जुजुं वनाः १ लाख बर्ष तक थ्यंवन ।
 थुगु अवस्थाय् सिध्दत्थ बोधिसत्त्व तुसिता भूवने पारमि पूरे
 ज्वी धुंकाः च्वना च्वना बिज्यात । वसपोलयाथाय् देव,
 ब्रह्मापिं वयाः मनूष्यलोके बुद्ध जू बिज्याय्त् प्रार्थना
 याःवल । इमिगु प्रार्थना न्यनाः सिध्दत्थ बोधिसत्त्व
 पञ्चमहाविलोकन (काल, देश, द्वीप, कूल, मातु आयू
 परिच्छेद) यात स्वया बिज्याःगु बखते मनूष्य लोके थुपिं
 न्यागू तत्वतनं पूरा जुयाच्वंगु खंका बिज्यात । उकें
 वसपोल तुसिता भूवनं कुहाँ बिज्यानाः मनूष्य लोकया
 वेभार देशय् उदेन जुजुया सुफस्सा देवी धयाम्ह
 अग्रमहारानीया गर्भे च्वंबिज्यात । कथहनं फ़िला पूरादयाः
 बैशाख पुन्ही खुन्हु विरीय धयागु बगैचाय् जन्म जुया
 बिज्यात । वसपोल जन्म जुया बिज्याःबले देशे अपो
 मनूतय् ततःधंगु इच्छात पुरेजूगु जुयाच्वन । उकें वसपोल
 बोधिसत्त्वयात सिध्दत्थ धकाः नामाकरण यात । बैश जाया
 वसेलि स्वंगू ऋतुयात ल्वेक च्वनेजीगु कथं स्वंगूहे
 दरवारत थुकथं विभिन्न नामाकरण यानाः दयकाबिल ।

१) कोणा दरवार

२) सुपल दरवार

३) पदुम दरवार

वसपोलयात सोमनस्सा युवराज्ञी प्रमुख ४८ हजार सेविकापिसं घेरेयाका विवाह यानाविल । युवराज्ञी प्रमुख सेविकापिं नाप उगु स्वंगू दरवारे बोधिसत्त्वं १० हजार वर्ष तक सुख भोग यानाविज्यात । छन्हु सोमनस्सा युवराज्ञीया पाखें अनुपम धयाम्ह काय् छम्ह दयवं सिध्दत्थ बोधिसत्त्वया मनय् तसकं वैराग्यभाव उत्पन्न जुल । छन्हु चाःह्यू विज्याःबले वसपोलं प्यंगू निमित्त (बुढा-बुढी, रोगी, सीम्ह मनू व त्यागी) खनाः वसपोलया मने भनहे तच्चःगु वैराग्यं थाय् काल । अले वसपोल थःगु हे तःधंगु बगैचाय् विज्यानाः प्रब्रज्या जुयाविज्यात । थुकथं बोधिसत्त्वं गृहत्याग याःगु सियाः मेपिं करोडौं पासापिसं नं विरक्त भाव वय्काः गृहत्याग यानाः पिहाँवन । सिध्दत्थ बोधिसत्त्वं थुपिं हे पासापिं नाप १० महिनातक दुष्कर चर्या यानाविज्यात । छन्हु वैशाख पुन्ही खुन्हु वसपोलयात सून्यता धयाम्ह ब्राह्मण पुत्रीं ब्यूगु क्षीर भोजन ४९ प्ये यानाः भपिया विज्यानाः वरुण धयाम्ह वुंथुवाः नं ब्यूगु ८ म्हु घाँय् महालेगा (कर्निकार वृक्ष) धयागु बोधिबृक्षमाया क्वे लाया विज्याःबले अन ४० कु हाकःगु आशन उत्पन्न जुल । उगु आशनय् वसपोलं प्यंगू वीर्ययात न्ह्योने तयाः बोधिज्ञान प्राप्त मज्जूतल्ले थुगु थासं दने मखु धकाः

अधिस्थान यानाः प्यतुनाः ध्यान यानाविज्यात । निभाःद्यो
मवीनिवं पञ्चमारयात दमन यानाः रात्रीया, प्रथम याम,
द्वितीय याम व तृतीय यामे क्रमशः पुब्बेनिवास ज्ञान
दिब्बचक्खु ज्ञान व आसवक्खय ज्ञान प्राप्त यानाः द्यो तुयू
तुयू धाःबले बोधिज्ञान प्राप्त यानाः सर्वज्ञ बुद्ध जुया-
विज्यात ।

बोधिज्ञान प्राप्त यानाविज्याय् धुंकाः वसपोल
बोधिबृक्षमाया जःखः सप्तसप्ताह (न्हेन्हु न्हेन्हु न्हयथाय्)
बोधिज्ञानयात विचाः यायां च्वनाविज्यात । उगु ४९ न्ह
तक वसपोलं छु हे आहार सेवन यानाविमज्याः । ४९ न्ह
पुलेधुंका ४९ प्ये यानाः भपिया विज्याःगु क्षीर भोजनया
शक्ति नं फुत बोधिज्ञान मालेगु ज्या नं क्वचाःबले विस्तारं
नयपित्याना वल । उकें वसपोल खुसी वनां ख्वाःसिलाः
दतिवन यानाः प्राप्त जूगु आहार सेवन यानाः थःमं प्राप्त
यानागु बोधिज्ञानया बारे सुयात धर्म देशना याय्माली
धकाः बुद्ध ज्ञानं स्वयाविज्याःगु बखते चित्त शुध्दपिं मनूत
ल्वीके थाक्वी थें च्वनाः निराश जुयाविज्यात । उथाय्
ब्रह्मा वयाः वसपोलयात संसारया दुःखी प्राणीपिन्त बुद्धया
ज्ञानं बाहेक मेगुलिं उद्धार याय् मफैगु जूगुलिं क्लेश
कमजोडपिं मनूतय्त ल्ययाः ल्ययाः सां धर्म देशना याना
विज्याय्त प्रार्थना याःवल । ब्रह्माया प्रार्थनायात स्वीकार

यानाविज्यानाः सिध्दत्थ बुद्धं सुयात धर्मदेशना याःसा ठीक
 ज्वी धकाः थःगु बुद्ध ज्ञानं स्वया विज्याःगु बखते थःनापं
 गृहत्याग यानावःपिं पासापिन्त खंकाविज्यात । उकें
 वसपोलं इमित हे धर्म देशना यानाविज्याय्गु लागि
 आकाश मार्गं ब्वयाः इपिं च्वनाच्वंथाय् मृगदावनय्
 विज्यानाः धर्मचक्र शूत्र देशना यानाविज्यात । थुगु
 धर्मदेशना न्यना आपालं मनूष्य व देव ब्रह्मापिं सांसारिक
 दुक्खं मुक्त जुल । थुकथं सिध्दत्थ बुद्ध व वसपोलया
 श्रावक श्राविकापिसं देशं देशे गामं गामे धर्म प्रचार यायां
 वसपोलया आपालं श्रावक श्राविका व उपासक
 उपासिकापिनिगु संख्या बृद्धि जुल ।

सिध्दत्थ बुद्धया अग्र श्रावक भिक्षुपिं - भिक्षु सम्बल व
 भिक्षु सुमित्त

सिध्दत्थ बुद्धया अग्र श्राविका भिक्षुणीपिं - सीवला थेरी व
 सुरामा थेरी

सिध्दत्थ बुद्धया नीजि सेवक भिक्षु - भिक्षु रेवत

सिध्दत्थ बुद्धया मुख्यपिं उपासकपिं - सुप्पिय व समुद

सिध्दत्थ बुद्धया मुख्यपिं उपासिकापिं - रम्मा व सुरम्मा

सिध्दत्थ बुद्धया म्हा धिकः - ६० कु हाक

सिध्दत्थ बुद्ध मनूतयगु आयू १ लाख वर्ष दुबले
 जन्म जू विज्याःगु खः ।

गौतम बुद्ध ज्वीह बोधिसत्त्व

सिध्दत्थ बुद्धया पाले गौतम बुद्ध ज्वीह बोधिसत्त्वं
मंगल धयाम्ह ऋषि जुयाच्चन । ऋषि जुया विज्याय् न्त्यो
वसपोल बोधिसत्त्व सुरसेन धयागु देशय् आपालं धन
सम्पत्तिं परिपूर्ण्ह मंगल धयागु नामं महाजनया काय्
जुयाच्चन । वसपोल बोधिसत्त्व ब्राह्मण कूले जन्म जूगुलिं
वेदं शास्त्रं पारंगत जुयाविज्यात । वसपोलयात थःगु
संस्कारं ध्वाना हःगुलिं छन्हु वसपोलया मनय् विरक्त भाव
दनावयाः गेरु वस्त्र पुनाः ऋषि जुयाः गृह त्याग यानाः
ध्यान भावना यायां समापत्ति ८ गू व अभिज्ञा ५ गू प्राप्त
यानाविज्यात । वसपोलं लोके गुबले बुद्ध उत्पन्न ज्वी
धकाः आशा याना च्वनाविज्याःबले लोके सिध्दत्थ बुद्ध
उत्पन्न जूगु समाचार थ्यन । थुगु उत्तम समाचार न्यनाः
बोधिसत्त्व तसकं लय्तायाः बुद्ध प्रति श्रद्धा उत्पन्न यानाः
थःगु ऋद्धी शक्तिं देवलोके विज्यानाः देवलोकया जम्बु दाँख
खाना हयाः बुद्ध सहित संघपिन्त श्रद्धा पूर्वक दान विया

विज्यात । मंगल ऋषिया थज्याःगु श्रद्धा खनाः बुद्धं थुम्ह
 व्यक्ति सु ज्वी व छु ज्वीम्ह ज्वी धकाः थःगु अनागतंश
 ज्ञानं स्वयाविज्याःवले वसपोल भद्रकल्पे गौतम गोत्रय
 शाक्य कूलय शाक्यमुनी बुद्ध धायकाः प्रख्यातम्ह बुद्ध
 ज्वीतिनिगु खंका विज्यानाः थुगु खं बोधिसत्त्व ऋषिया
 न्ह्योने भविष्य वाणी यानाविज्यात । बोधिसत्त्व ऋषिं थःगु
 वारे भविष्य वाणी न्यना विज्यानाः तसकं लयतायाः थःगु
 पारमिता धर्मयात उत्साहपूर्वक वृद्धी याना यंकु यंकु
 तथागतया सेवा यायां सिनाः ब्रह्मलोके जन्म काः
 विज्यात ।

Dhamma.Digital



मन्द कल्प २०. तिस्स बुद्ध

तिस्स बुद्ध नीच्याम्ह तथागतपिनि भवल्य् नीं
म्हम्ह बुद्ध खः । व्रसपोल मन्दकल्प्य् बिज्याःपिं निम्ह बुद्ध
मध्ये न्हापांम्ह बुद्ध खः ।

सिध्दत्थ तथागतं जगत संसारया आपालं प्राणी
पिन्त उद्धार यानाबिज्याय् धुंकाः परिनिर्वाण जुया बिज्यानाः
बुद्ध शासन नं लोप जुयावन । साथे सार कल्प नं नास
जुयावनाः असंख्य कल्प तक सुन्य कल्प वयाच्चन । थुगु
असंख्य सुन्य कल्प नं कथहनं नास जुजुं फुनावनाः थौकन्हे
नं ९१ गू कल्प न्हापा मन्द कल्प उत्पन्न जुल । थुगु
मन्दकल्प्य् निम्ह बुद्धपिं पालंपाः थुकथं उत्पन्न जुल ।

- १) तिस्स बुद्ध
- २) फुस्स बुद्ध

मन्द कल्प शुरु ज्वीवं संसारं मनूतय असंख्य आयु
 दयाच्चन । असंख्य आयु दुषिं मनूतय मने विस्तारं लोभ,
 द्वेष, मोह आदि क्लेशं थाय कालिसं मनूतयगु आयु
 सच्छिदंय दच्छि घटे जुजुं आखिरय १ लाख वर्षतक थ्यन ।
 थुवले तित्स वुद्ध जुयाविज्याइम्ह वोधिसत्त्व तुसिता भूवने
 च्वना विज्याःवले वसपोलयाथाय ३३ कोटी देवतापिं वनाः
 मनूष्यलोके वुद्ध जुयाविज्यायत प्रार्थना याःवल ।
 देवतापिनि प्रार्थना न्यनाः वसपोलं पञ्चमहाविलोकन
 (काल, देश, द्वीप, कूल, मातु आयुपरिच्छेद) यात स्वयाः
 थुपिं न्यागू तत्त्वत नं चूलागु सीकाः तुसिता भूवनं मनूष्य
 लोकया खेमक धयागु देशया जनस्सन्ध धयाम्ह जुजुया
 पदुमा देवी धयाम्ह अग्र महारानीया गर्भे च्वविज्यात । गर्भे
 च्वनाः १० महिना पुवंसेलि वसपोल वैशाख पुन्ही खुन्हु
 अनोमा धयागु वगैचाय जन्म जुयाविज्यात । वसपोल
 तित्स धयागु नामं प्रख्यात जुल । कथहनं वोधिसत्त्व
 कुमारया वैश जाया वसेलि वसपोलयात स्वंगू मौसम

अनुकूल मिले याना: च्वनेगु लागि स्वंगू दरवारत थुकथं
विभिन्न नां तथा: दयकाविल ।

- १) गुहासेल दरवार
- २) नालीस दरवार
- ३) तिस्सभ दरवार

बोधिसत्त्व राजकुमारयात सुभद्रा युवराजी प्रमुख
३३ हजार सेवीकापिसं चा:ह्वीका: विवाह यानाविल ।
युवराजी प्रमुख सेविकापिं नाप उगु स्वंगू दरवारे वसपोलं
७ हजार वर्षतक काम सुख भोग यानाविज्यात । छन्हु
वसपोलयात आनन्द धयाम्ह पुत्र लाभ जुल । काय् छम्ह
दसां निसें तिस्स बोधिसत्त्वया मने वैराग्य दनावल । छन्हु
चा:ह्यू विज्या:वले प्यंगू निमित्त (बुढा-बुढी, रोगी, सीम्ह व
त्यागी) खंसां निसेंला अभ वैराग्य जुया: काम सुख फुक्कं
फुसुलुगु व्यर्थगु खंका: सोणुत्तर धयाम्ह सल गया:
गृहत्याग यानाविज्यात । तिस्स बोधिसत्त्वं गृहत्याग याना
विज्या:गु खवर न्यना: मेपिं १ करोड मनूतसैं नं गृहत्याग
याना: वसपोलया नाप नापं पिहाँवन । तिस्स बुद्धं

थुपिं मनूत नापं ८ ला तक दुष्कर चर्या यानाबिज्यात ।
 छन्हु वैशाख पुन्ही खुन्हु वीर निगमय् च्वंम्ह महाजनया
 म्प्यायूनं दान ब्यूगु क्षीर भोजन ४९ प्ये यानाः भपाः
 बिज्यानाः विजित संगामक धयाम्ह बुंथुवाः नं ब्यूगु च्याम्हू
 घाँय् दान कयाः म्हास्सुक स्वाँ ह्वइगु भटाउ सिमा (असन
 वृक्ष) धयागु बोधिबृक्षमाक्वय् लाया बिज्याःबले अन आशन
 छगू उत्पन्न जुल । उगु आशनय् वसपोलं प्यंगू वीर्ययात
 न्ह्योने तयाः (ला-हिगनावंसां, क्वँय हे चूं चूं दंसां, हिनूहे
 चब्बूसां) बोधिज्ञान प्राप्त मजूतल्ले थुगु आशनं दनावने
 मखु धकाः अधिस्थान यानाः आशनय् प्यतुनाः ध्यान
 यानाबिज्यात । द्यो निभाः मबीनिवं पञ्चमारयात त्याकाः
 रात्रीया प्रथम याम, द्वितीय याम, व तृतीय यामे क्रमशः
 पुब्बेनिवास ज्ञान, दिब्बचक्खु ज्ञान व आसवक्खय ज्ञान
 प्राप्त यानाः द्यो तुयु तुयू धाःबले बोधिज्ञान प्राप्त यानाः
 बुद्ध जुयाबिज्यात । बोधिज्ञान प्राप्त याना बिज्याय् धुंकाः
 तिस्स बुद्ध बोधिबृक्षमाया जःखःसप्त सप्ताहतक (४९ न्हु)
 तक बोधिज्ञानयात च्वं निसें क्वथ्यं क्वनिसें

च्वथ्यंक विचाः यानाः च्वनाविज्यात । क्षीर भोजनया
 शुद्धता व बोधिज्ञान लाभ जूगु प्रीतिया कारणं वसपोलं
 ४९ न्हु तक छुं हे आहार सेवन याना विमज्याः । ४९ न्हु
 सिधःबले बल्ल वसपोलया बोधिज्ञानया बारे विचाः यायगु
 ज्या नं सिधल, क्षीर भोजनया शक्ति नं मदया वन ।
 अले वसपोलयात नय् पित्याःगु अनुभव जुयावल । उकें
 तिस्स बुद्धं खुसी विज्यानाः ख्वाः सिलाः दतिवन यानाः
 प्राप्त जूगु आहार भपियाविज्यात । अनलि बुद्धं थःमं प्राप्त
 यानागु ज्ञान सुयात कनेमाली धकाः स्वयाविज्याःगु बखते
 क्लेश ख्वातुपिं मनूत जक खंकाः निराश जुयाविज्यात ।
 थुबले हे ब्रह्मा वयाः वसपोलयात क्लेश सालुपिं मनूत
 मालाः धर्म देशना यानाः जगत संसार उद्धार
 यानाविज्याय्त प्रार्थना याःवल । ब्रह्माया प्रार्थना न्यनाः
 सुयात धर्म देशना याय् माली धकाः बुद्ध ज्ञानं स्वया
 विज्याःगु बखते हंसावती देशया ब्रह्मादेव राजकुमार व
 उदय राजकुमार निम्हेसित खंकाविज्यात । अले वसपोल
 मंगल बगैचाय् विज्यानाः बगैचा थुवाःयात इपिं निम्हं

राजकुमारयात सःतके छ्वयाविज्यात । राजकुमारपिं
निम्हस्यां आपालं परिवारपिं व्वनाः बुद्ध च्वना विज्याःगु
बगैचाय् उपस्थित जुल । बुद्धं राजकुमार निम्ह प्रमुख
आपालं मनूत व देव ब्रह्मापिन्त धर्मचक्र प्रवर्तन याना
विज्याःबले इपिं फुक्कस्यां मार्गफल प्राप्त यानाकाय्त
सफल जुल । थुकथं तिस्स तथागतं नगरं नगरे, गामं गामे
धर्म प्रचार यायां वसपोलया आपालं श्रावक श्रावीकापिं व
उपासक उपासिकापिं दत ।

तिस्स बुद्धया अग्र श्रावक भिक्षुपिं -ब्रह्मा देव भिक्षु व
उदय भिक्षु

तिस्स बुद्धया अग्र श्राविका भिक्षुणीपिं-फुस्सा थेरी व
सुदत्था थेरी

तिस्स बुद्धया नीजि सेवक - समंग भिक्षु

तिस्स बुद्धया मुख्य उपासकपिं- सम्बल व सिरिम

तिस्स बुद्धया मुख्य उपासिकापिं- किशा गौतमी व
उपसेना

तिस्स बुद्धया म्हाधिकः -६० कु हाकः

तिस्स बुद्ध मनूतयगु आयु १ लाख वर्ष दुबले जन्म
जुयाविज्याःगु खः।

गौतम बुद्ध ज्वीम्ह बोधिसत्त्व

तिस्स बुद्धया पाले गौतम बुद्ध जुयाविज्याइम्ह
बोधिसत्त्व सुजात ऋषि जुयाच्चन । ऋषि ज्वी न्ह्योः तिस्स
बुद्ध लोके उत्पन्न मज्जिबले वसपोल बोधिसत्त्व हंसावती
देशे सुजात नां दुम्ह जुजु जुयाच्चन । छन्हु वसपोलया
संस्कारं घ्वानाहःबले जुजु जुयाच्चम्ह बोधिसत्त्वया मने
तसकं बैराग चित्त उत्पन्न जुयावल । वसपोल जाती, जरा
व्याधी, मरण, भय खनाः ग्यानाः सप्तरत्नया दरवार,
आपालं कोटी धन व महारानीपिं सहित त्याग यानाः ऋषि
जू विज्यात । थुकथं ऋषि जुयाः ध्यान भावना यायां
वसपोलं च्यागू समापत्ति व न्यागू अभिञ्जा लाभ
यानाविज्यात । सुजात ऋषि लोकय् तिस्स बुद्ध उत्पन्न
जूगु समाचार सीकाविज्यात । अले वसपोलया मनय् हर्ष
भय वियाः न्यागू प्रकारया प्रीति उत्पन्न जुल । सुजात

ऋषि जुयाच्चंमह वोधिसत्त्वं थःगु ऋद्धि वलं देवलोकया
अनेक स्वां थ्वयाडयाः तिस्स बुद्धयात पूजा यानाविज्यात ।
उलि जक मखु सप्तरत्नया कुसा दयकाः तिस्स बुद्धयात
श्रद्धापूर्वक कुइकाविज्यात । सुजात ऋषिया थपायच्चः श्रद्धां
विलिविलि जाःगु दृष्य खँवले तिस्स बुद्धं थ्व सुज्जीमह धकाः
अनागतंश ज्ञानं थ्वया विज्याःवले वसपोल भद्रकल्पे गौतम
गोत्रय् शाक्य कुल्य् शाक्यमुनी बुद्ध धायकाः प्रख्यात
ज्जीतिनिमह धयागु सीकाः वोधिसत्त्वया न्ह्योने हे वसपोलं
थ्व खँया भविष्यवाणी यानाविज्यात । थुगु भविष्य वाणी
न्यनाः सुजात वोधिसत्त्व तसकं लयतायाः दश पारमिता व
ध्यान भावना बुद्धि यायां पारमी धर्म पुरे याना यंकेगुली
अभ्क उत्साही जुजुं बुद्धप्रति यक्को श्रद्धा पूर्वक सेवा यायां
ब्रह्मलोके जन्म काःविज्यात ।

धर्मकीर्ति प्रकाशन

(नेपाल भाषा)

१. महासतिपट्ठान सूत्र
२. बुद्धया भिनिगू विपाक
३. अभिघर्म (भाग-१)
४. ऋद्धि प्रतिहार्य
५. बासेट्ठी बेरी
६. यःम्ह म्हायाय्
७. पञ्चनीवरण
८. भावना
९. एकताया ताः चा
१०. प्रेमं छु ज्वी
११. त्रिरत्न गुण स्मरण
१२. बुद्ध पुजा विधि (प्र. सं.)
१३. मैत्री भावना
१४. कर्तव्य (प्र. सं.)
१५. मिखा
१६. परित्राण
१७. हृदय परिवर्तन
१८. बुद्धया अन्तिम यात्रा (भाग-१)
१९. बुद्धया अन्तिम यात्रा (भाग-२)
२०. कर्म
२१. बाखं (भाग-१)
२२. बौद्ध ध्यान (भाग-१)
२३. बोधिस्तव
२४. शाक्यमुनि बुद्ध
२५. जनतलक्खण सूत
२६. मत्ति भिंसा गति भिनि
२७. अहिंसाया विजय
२८. बाखं (भाग-३)
२९. महास्वप्न जातक (प्र. सं.)
३०. लक्ष्मी घो
३१. अभिघर्म (भाग-२)
३२. बाखंया फल (भाग-१)
३३. बाखंया फल (भाग-२)
३४. क्षान्ति व मैत्री
३५. प्रार्थना संग्रह
३६. बाखं (भाग-२) (टि.सं.)
३७. प्रौढ बौद्ध कक्षा
३८. मूर्खम्ह पासा मज्जू
३९. बुद्धया अर्थनीती
४०. भ्रमण नारद
४१. उखानया बाखं पुच
४२. पालिभाषा अवतरण (भाग-१)
४३. न्हापायाम्ह गुरू सु ? (टि.सं.)
४४. पालि प्रवेश (भाग-१)
४५. पालि प्रवेश (भाग-२)
४६. चमत्कार
४७. बाखं (भाग-४)
४८. राहुल यात उपदेश
४९. अभिघर्म (चित्तकाण्ड छगुया संक्षिप्त परिचय
५०. मणिचूड जातक
५१. महाजनक जातक
५२. गृही विनय (तु.सं.)
५३. चरित्र पुचः (भाग-१)
५४. बौद्ध ध्यानः (भाग-२)
५५. शान्तिया त्वाथः
५६. बुद्ध व शिक्षा (ख)
५७. विश्व धर्म प्रचार देशना (भाग-२)
५८. जातकमाला (भाग-१)
५९. त्रिरत्न बन्दना व सूत्र पुचः
६०. चरित्र पुचः (भाग-२)
६१. त्रिरत्न बन्दना व पञ्चशीलया फलाफल
६२. लुम्बिनी विपस्सना
६३. विश्व धर्म प्रचार देशना (भाग-१)
६४. योगीया चिट्ठी
६५. संक्षिप्त बुद्ध जीवनी
६६. बुद्ध धर्म
६७. जातक बाखं
६८. जातक माला (भाग-२)
६९. सर्वज्ञ (भाग-१)
७०. पालि प्रवेश (भाग- १,२)

७१. किशा गौतमी
 ७२. जप पाठ व ध्यान
 ७३. धर्म मसिनी
 ७४. तेमिय जातक
 ७५. त्रिरत्न गुण लुमके ज्ञानया मिखा चायके (प्र. सं.)
 ७६. धम्मपद (श्लोकवद्ध भाषानुवाद)
 ७७. बाखं (भाग-५)
 ७८. सप्तरत्न धन
 ७९. सर्वज्ञ (भाग-२)
 ८०. दान
 ८१. बम्मिक सुत्त
 ८२. मध्यममार्ग
 ८३. महासीहनाद सुत्त
 ८४. भिम्ह काय् व म्थ्याय्
 ८५. भिजु जीवन
 ८६. समय व विपश्यना सक्षिप्त भावना विधि
 ८७. महानारद जातक
 ८८. भिम्ह मचा
 ८९. विवेक बुद्धी
 ९०. भंग लाइम्ह लाखे
 ९१. बुद्ध पुजा विधि (द्वि. सं.)
 ९२. स्वास्थ्य लाभ
 ९३. शिक्षा (भाग-१)
 ९४. शिक्षा (भाग-२)
 ९५. दृष्टि व तृष्णा
 ९६. विपस्सना ध्यान
 ९७. सतिपट्ठान भावना
 ९८. बाखं (भाग-६)
 ९९. धम्मचक्कपवतन सुत्त (प्र. सं.)
 १००. गौतम बुद्ध
 १०१. नेपालय् २५ दं जिगु लुमन्ति
 १०२. बुद्ध व शिक्षा (क)
 १०३. शिक्षा (भाग-३)
 १०४. शिक्षा (भाग-४)
 १०५. महा स्वप्न जातक (द्वि. सं.)
 १०६. धम्मपद व्याख्या (भाग-१)
 १०७. धम्मपदया बाखं
 १०८. अभिधर्म (भाग-२) (द्वि. सं.)
 १०९. संसारया स्वाप्
 ११०. धम्मपद (मुल पालि सहित नेपाल भाषय् अनुवाद) (पां. सं.)
 १११. आर्दश बौद्ध महिलापिं
 ११२. बौद्ध नैतिक शिक्षा (भाग-१)
 ११३. वेस्सन्तर जातक
 ११४. निर्वाण (रचना संग्रह)
 ११५. त्रिरत्न गुण लुमके ज्ञानया मिखा चायके (द्वि. सं.)
 ११६. पालिभाषावतरण (भाग-२)
 ११७. दिर्घायु ज्वीमा
 ११८. न्हुगु त्रिरत्न वन्दना व धम्मपद
 ११९. मनूतयगु पढः
 १२०. संस्कृति
 १२१. कर्तव्य (द्वि. सं.)
 १२२. विशेष म्ह मफैबले पाठ यायेगु परित्राण
 १२३. बुद्धया करुणा व ब्रह्मदण्ड
 १२४. विरकुशया बाखं
 १२५. त्रिरत्न वन्दना व परित्राण
 १२६. धम्मचक्कपवतन सुत्त (द्वि. सं.)
 १२७. पट्ठानपालि
 १२८. कर्म व कर्मफल
 १२९. शिक्षा (भाग-५)
 १३०. धर्मया ज्ञान (भाग-२)
 १३१. बौद्ध ध्यान
 १३२. सक्षिप्त बुद्ध वंश (भाग-१)
 १३३. सक्षिप्त बुद्ध वंश (भाग-२)

मुद्रकः ज्योती प्रिन्टिङ्ग प्रेस लाजिम्पाट, काठमाडौं
 फोनः ४२८४८६, ४२८४८८